

# Yeesus opor eliwa fain Yon-ke siisimok

## Miimow opora

Opor eliwa Yon siisimok nain Yeesus feenap maek, “Mua Maneka Opora-ke mua arep i yiamiya ikaiya.” O wi emeria mua Yeesus Mua Maneka Muuka-ke mauk naep opor unowa siisimok. Mua Maneka-ke sesekowa naek nain iiriw maep koonowak. Yon-ke Yeesus maemi feenap maek, “Opora nain miiwa me imenarowa ikaeya Mua Maneka wameiya ikua.” Naap maep Yeesus eena maa miililina onomakek nain maek. Naeya i feenap maiyen, Mua Maneka mua-ko sesekeya yia aawowa maek nain ona Muuka naneka, naap maiyen. Ne Yeesus maa miililina onomakek nain kemena ikua, nain pun siisimok.

Yon opora siisimok nain ara unowa fain maek, wi emeria mua anane eliwa ikowa aawemi Kristen teeria kakeniw ikowa sira. Ne naapeya Yeesus nain maemi maa unowa fain maemi opora anian wia kaisam-ikomak: ewar, eka, emer ikowa, parina, wain nomokowa ne sipsip nepiow mua.

---

## Opora-ke mua arek

**1** <sup>1</sup>Iiriw eker a miiwa ne maa muutitik me imenarowa ikua nain Opora ona iiriw ikua. Opora fain Mua Maneka wameiya ikua ne Opora fain pun Mua Maneka-keriw. <sup>2</sup>Opora ona iiriw eker a Mua Maneka wameiya ikua. <sup>3</sup>Mua Maneka-ke Opora fainiw maa maeya maa imenar-ikim-ikua. Maa kuisow Opora fainiw me imenarek nain-ko me ikua, weetak. <sup>4</sup>Opora fain anane eliwa ikowa onoma-ke, ne nain-ke i emeria mua kema yia parinaroweya opor makena amisarimik. <sup>5</sup>Parina nain-ke epa kokoma parina iwiya, ne epa kokoma-ke mesalimowa me pepep.

<sup>6</sup>Ne aria Mua Maneka-ke sesel mua eena Yon naimik nain sesekak. <sup>7</sup>Os-ke parina nain maemi wi mua wia maakekam naep o kiikir miimok, wi miimap opora wiar opami ookuk naep. <sup>8</sup>Yon ona me parina nain-ke, weetak. Os-ke parina opora nain wia maakowa naep ekapok. <sup>9</sup>Iir nain parina makena eena mua unowa kema wia parinarowiya nain miiwa-pa ariman arekam naep onam-ikua. <sup>10</sup>Opora nain iiriw eker a miiwa-pa ikua, ne os-ke maa maeya imenarem-ikua. Nain ona ekapep ikua nain wi

emeria mua o me amisaremik. <sup>11</sup>O imenarep ona opor epaskun wiamiya ikua nain kemelap me aawemik. <sup>12</sup>Ne wi emeria mua eena o aawep opora wiar opamik nain os-ke wia puukap wia aawep pekap Mua Maneka muuka wiipa wia arowak. <sup>13</sup>Wi Mua Maneka muuka wiipa wiar aremik nain me onak-ke muukareya aka ookami naap maimik. Ne me wi onak wiawi kookalowa-pa imenarep naap maimik, nain pun weetak. Ne pun me wi mua kookalowa-pa muuka wiipa wia imenimik sira nain maimik, weetak. Mua Maneka ona sira ookami naap maeya muuka wiar aremik.

<sup>14</sup>Opora nain-ke mua arep orop i miiw mua yiamiya ikua. Ne o unum maneka ne parin maneka wiar ikua nain i wiar urufamik, unuma ne parina nain Mua Maneka-ke ona Muuka kuisow akena nain iwok. O manek akena yia kemaliya, ne opor makena onoma os.

<sup>15</sup>Yon Baptais-ke nain maemi faremi maem-ikua, “Yo iiriw nia maakem, mua oko ikoka murarep ekapinon naem, ne mua nain aakisa fanek. O yena Maneka-ke, ne yo o tepak-pa wiar ikem. Moram o iiriw ekeria ikua, yo me imenarowa ikemkun,” naap maek. <sup>16</sup>Aria, o manek akena yia kookalemi yia asipiya, ne iiriw sira eliwa yia onomak, nain aakisa sira onaiya yia onomak nain eliwa akena. <sup>17</sup>Feenap, Mua Maneka ona ni baliwep ikeka naep sira unowa nain iiriw ekeria Moses iweya yia maakomakek. Ne aakisa ona yia kemaliya nain, ne ona opor makena nain Yeesus Krai-ke yia ofakowak. <sup>18</sup>Mua kuisow Mua Maneka-ko me urufimik, weetak akena. Makena, ona Muuka kuisow akena eena Wiawi mamaiya-pa ikua nain-ke ona mia-pa yia ofakoweya Wiawi wiar amisaremik.

### Yon-ke Yeesus maek

*(Matiu 3.1-12, Mak 1.7-8, Luk 3.15-17)*

<sup>19</sup>Aria wi Yuuda woos mua-ke Yon baliwep amisaru naep wi pris ne wi Liwai papako wia sesekamik. Wi nain Yerusalem piipup ekapep Yon nokaremik, “Ei, no naareke?” <sup>20</sup>Nokariwkin opora me kokotak, makena wia maakek, “Yo me Mesaiya-ke.” <sup>21</sup>Naeya nokaremik, “Naap nain no naareke? No Elaiya-ki?” Ne maek, “Weetak, yo me os-ke.” Naeya kiiriw nokaremik, “No Mua Maneka profet i arewimik nain-i?” Ne maek, “Yo weetak.” <sup>22</sup>Ne kiiriw maakemik, “Naap nain baliwep yia maake, no naareke. Naeya wi mua yia sesekamik nain ikip kakeniw naap wia maakiyen. No kamenap name mainan?”

<sup>23</sup>Ne Yon-ke wia maakemi iiriw eena profet Aisaiya opora maek nain wiar maemi maek, “Yo mua eena epa asia nomon manekiw neeke farem-ikainon naek, yo mua nain-ke. Naap farem-ikaiya, ‘Niena Maneka soomarowa era eepomaka.’”

<sup>24</sup>Aria wi Farisi papako pun wi teeria nain wiamiya wia sesekiwkin ekapep nan ikemik. <sup>25</sup>Ne wis-ke Yon maakemik, “No naap name main,

no me Mesaiya-ke, no me Elaiya-ke ne no me profet i arewimik nain-ke. Naap nain, no moram eka-pa wia yasuwin?" <sup>26</sup>Ne wia maakek, "Yo aakisa oram eka-pa wia yasuwiem. Mua oko nan ikua. O ni gone-pa niar ikua nain ni me amisareman. <sup>27</sup>O murarep ekapinon, o saria maneka akena-ke. Yo mua meta marew akeniya o taar teekow mua murarow akena-pa wiar ikem," naap maek.

<sup>28</sup>Aria wi Yon nokaremik nain o Yodan eka pona-pa mua wia yasuwam-ikaeya nokaremik. Epa nain Betani owowa Yodan eka kame okaiwi ama urupow ekeria-pa ikua.

### Yeesus Mua Maneka Sipsip Muuka-ke

<sup>29</sup>Aria naap ikok iir oko-pa Yeesus Yon wiar ikiwem-ikaeya urufap maek, "Ni urufeka, Mua Maneka Sipsip Muuka fanek. Ikoka os-ke miiw mua pina yiar iirarinon. <sup>30</sup>Mua makena yo iiriw maem-ikem nain fanek. Feenap maem, mua nain yo murarep ekapinon, yena Maneka-ke, ne yo tepak-pa wiar ikem. Moram o iiriw ekeria ikua, yo me imenarowa ikemkun. <sup>31</sup>Yos pun o me amisarem, yo mua eka-pa wia yasuwam-ikem nain wi Isrel o urufap amisaruk naep naap onam."

<sup>32</sup>Neemi wia maakek, "Yo Mua Maneka Ewar Eliwa urufam, nepa ibiamun saarik orop ikiwosa iinan-pa wiar pokak. <sup>33</sup>Yo mua nain me amisarekam, nain Mua Maneka ona efa maakemi efa sesekeya eka-pa wia yasuwowa ekapem. Os-ke feenap efa maakek, 'No Ewar Eliwa-ko urufinan, orop mua oko-pa wiar pokiya-na ikoka mua nain-ke Ewar Eliwa-pa wia yasuwam-ikainon.' <sup>34</sup>Yo urufam, naapeya maiyem, o Mua Maneka Muuka-ke."

### Mua erup Yeesus ookamik

<sup>35</sup>Aria iir oko-pa Yon ona teeria mua erup wiamiya nainiw epa nan iimarep ikemik. <sup>36</sup>Iimarep ikaiwkin Yeesus ikim-ikaeya Yon-ke urufap wia maakek, "Urufeka, Mua Maneka Sipsip Muuka ikim-ikaiya nanek." <sup>37</sup>Naeya mua wiam erup nain naap miimap Yeesus ookamik. <sup>38</sup>Yeesus kirek-na wia urufap wia nokarek, "Ni moram?" Ne maakemik, "Somek mua, no kaanek ikain?" <sup>39</sup>Ne wia maakek, "Yookap ikip urufeka." Ne iir nain ama orop urerarek. Mua wiam erup nain Yeesus ookap ikip wameiya nan ikemik.

<sup>40</sup>Mua wiam erup Yon opora miimap Yeesus ookamik nain oko Saimon weepe Andru. <sup>41</sup>Aria o ewuriw akena ikiwemi ona wiamun Saimon imenap maakek, "I Mesaiya urufamik." (Mesaiya kemena feenap, "Mua eena Mua Maneka-ke pepekimpep sesekak nain", ne wi Grik opora-pa Kraisa naimik.) <sup>42</sup>Neemi wiamun aawep Yeesus wiar pikiweya Yeesus-ke Saimon mokakemi maakek, "No Yon muuka-ke, no unuma Saimon. No aakisa unuma Sifas nefa naiyem." (Wi Grik opora-pa unuma nain "Pita" naimik, unuma nain pun kemena feenap, "Nomona".)

### Yeesus-ke Filip Nataniel ikos wia farek

<sup>43</sup>Uurik ona-pa Yeesus Galili ikiwekam naep onam-ikok Filip urufap maakek, “Aria, yo yooke.” <sup>44</sup>(Filip-na ona owowa Betsaida, ne Andru Pita ikos pun wi owowa nain-ke.) <sup>45</sup>Ne Filip-ke Nataniel urufap maakek, “I mua eena Moses o maep opora siisimep-puak nain ne wi Mua Maneka profet maemik, nain mua makena nain imenamik. Mua nain Nasaret owow mua-ke, unuma Yeesus naimik, Yosep muuka-ke.” <sup>46</sup>Ne Nataniel-ke nokarek, “Aa, no Nasaret owowa main nain maa eliwa-ko anane nan wiar imenariya-i?” Naeya Filip-ke maakek, “Oram yookap ikip urufe.” <sup>47</sup>Ne ikip Yeesus mamaiya ariwkin Yeesus-ke Nataniel maemi maek, “Aa, Isrel mua makena nanek, o me wadolaliya.” <sup>48</sup>Nataniel naap miimap Yeesus nokarek, “Nee, yo kamenap efa amisaren?” Naeya maakek, “No Filip me nefa imenowa ikaeya nomokow fik epa ununa-pa iimarep ikaeya nefa urufam.” <sup>49</sup>Ne Nataniel nan amisarep maakek, “Oo somek mua, makena, no Mua Maneka Muuka-ke. Ne pun no i Isrel Saria Maneka-ke.” <sup>50</sup>Ne Yeesus-ke maek, “No nomokowa fik onoma-pa ikaeya nefa urufam, naap nefa maemkun no maa makena-ke naep opora efar opan. No ikoka maa mane-maneka maa fain nomakep ikua nain unowa urufinan.” <sup>51</sup>Neemi wia maakek, “Yo makena nia maakiyem, ikoka owow iinan iipareya Mua Maneka ensel unowa Mua Muuka wiar orop urup naem-ikaiwkin wia urufowen.”

### Yeesus eka kiripeya wain eka imenarek

**2** <sup>1</sup>Aria fofa erup naap ikiweya Kaana owowa-pa mua-ko emeria aaweya enow maneka onamik. Owowa nain Galili kame-pa ikua. Ne Yeesus onak pun nan ikua.

<sup>2</sup>Yeesus fariwkin ona teeria unowiya wia urufowa ikiwemik. <sup>3</sup>Naap ikok wain eka wiar weesereya onak-ke ekap mamaiya-pa maakek, “Wi wain wiar weeserek.” <sup>4</sup>Naeya onak maakek, “Sa, aite no moram efa maakin. Yo epa eewuar efar ikua.” <sup>5</sup>Ne onak-ke wi uuwow mua wia maakek, “Ni maa mauwa onowa nia maakinok-na naap onap-pueka.”

<sup>6</sup>Aria eka amina mane-maneka nomoniw onamik nain ikur okaiwi-pa kuisow nan ikua. Wiena Yuuda sira ookami eka amina neeke unep wapena yasuwimik. Amina nain maneka, eka andet lita naap eliw ototinan. <sup>7</sup>Ne Yeesus-ke uuwow mua wia maakeya, amin unowa nain eka ototamik. Ototiwkin taanomakeya <sup>8</sup>wia maakek, “Eka nain unep iimarow mua pikiwomaka.” <sup>9</sup>Ne pikiwiwkin iimarow mua nain akimak-na eka nain wain puukak. O kaanek aawep pekapomamik nain me amisarek, ne wi uuwow mua eka unep naap onamik nain wi amisaremik. Naapeya o mua emeria aawok nain farep <sup>10</sup>maakek, “Ei, mua unowa maa enowa onami wain eliwa kiikir poraimik, enep lawiliw momorariwkin eliw

marew nain poraimik. Ne nos-ke wain eliwa nan wuap-puap aakisa fan poron.” <sup>11</sup> Yeesus maa miililina onak nain mokomokoka nan onak. Ona kekanowa ne unum maneka kame nan ariman wueya wiar urufamik. Naapeya ona teeria makena-ke naep opora wiar opamik. <sup>12</sup> Aria maa enowa nain weesereya Yeesus ne onak, ona wiamun unowa ne ona teeria, wi unowiya Kapeneam owowa orop lawisiw nan ikemik.

**Yeesus tempel koora ikiwok**

*(Matiu 21.12-13, Mak 11.15-17, Luk 19.45-46)*

<sup>13</sup> Aria wi Yuuda Pasowa maapora mamaiyarem-ikaeya Yeesus Yerusalem ikiwok. <sup>14</sup> Ikiwep fuunep tempel pika kemena urupok-na wi mua-ke patriow maa sesekam-ikawaiwkin wia urufak, bulmakau, sipsip ne nepa ibiamun, maa naap nain. Ne wi mua papako pun nan pokap ikok wienna maamuma wia kiripomami tempel maamuma wuowa nain wiem-ikemik. <sup>15</sup> Naap wia urufap iikirami waamara aawep purekap sarua wiaremi bulmakau ne sipsip wiar fa-faemi maa unow onaiya wia iirarek. Maamuma esimsa onaiya nameneya wiar ururek. <sup>16</sup> Ne wi nepa sesekam-ikemik nain pun wia iiraremi wia amukarek, “Niena nepa aawep owaruma oreka. Yena Auwa koora fain niena fofa epa saarik me aroweka.”

<sup>17</sup> Naap oneya ona teeria Mua Maneka opora nain kema suuwamik. Feenap,

“Nena tempel koora manek akena kookaliyem nain mukuna saarik efa kuumiya.” *(Someka 69.9)*

<sup>18</sup> Ne Yeesus sira naap wia oneya wi Yuuda woos mua-ke maakemik, “Naapeya no aakisa kuisow maa miililina-ko oneya i urufap maiyen, ‘Aa pepek, no Mua Maneka kekanowa onaiya ikon, naapeya sira naap yia onan,’ i naap maiyen.” <sup>19</sup> Ne wia maakek, “Ni tempel koora fain teekowen-na yo fofa arow muutiw kiiriw enuma kuainen.” <sup>20</sup> Naeya maakemik, “Sa, koora fain kuam-ikawaiwkin mokoma ten erepam nainiw ikur okaiwi-pa kuisow arek. Ne nos-ke fofa arow muutiw eliw enuma kuainan-i?” <sup>21</sup> Yeesus eena ona wame maemi tempel koora maek, ne wi nain kemena me wiar aawemik. <sup>22</sup> Naapeya o umep ikok iikireya iir nain ona teeria-ke opora eena iiriw wia maakek nain wiar kema suuwap maemik, makena. Mua Maneka opora pun makena maemik.

**Yeesus emeria mua kema wiar amisarek**

<sup>23</sup> Aria Yeesus Yerusalem-pa ikok Pasowa maapora epa-pa maa miililina imenam-ikaeya mua unowa nain wiar urufap makena-ke naemik. <sup>24</sup> Nain ona wi kema wiar amisarek. Naapeya wi me mua makena-ke wia naemi ona kema ariman me wia wuomak. <sup>25</sup> Onaiw wi mua sira ne kema baliwep akena wiar amisarek, mua oko-ke me maakemik.

**Yeesus Nikodemus ikos aakunemik**

**3** <sup>1</sup>Aria wi Farisi teeria mua oko nan ikua, unuma Nikodemus, wi Yuuda Kaunsel Maneka mua oko os. <sup>2</sup>Iir oko uura ikip Yeesus maakek, “Nee, i amisaremik, no somek mua-ke, Mua Maneka-ke nefa sesekeya ekapon. No eena maa onin nain mua kuisow naap-ko me onimik. Makena, Mua Maneka o wameiya ikainon-na eliw naap oninon.” <sup>3</sup>Naeya maakek, “Yo makena nefa maakiyem. Mua eena kiiriw enuma me ariya nain Mua Maneka pika kemena me wiar ekinon.” <sup>4</sup>Ne Nikodemus-ke maakek, “Mua iiriw arimemik nain mia kamenap kirep nainiw enuma arikuan? Kiiriw onak urom tepak wiar ikiweya nainiw muukarinon-i?”

<sup>5</sup>Naap maeya Yeesus-ke maakek, “Yo makena nefa maakiyem, mua eena eka-pa wia yasuwiwkin Ewar Eliwa-ke enuma wia arowinon-na Mua Maneka pika kemena wiar ekikuan. Weetakeya-na weetak. <sup>6</sup>Aite-ke yia muukariwkin i miw fain mua arimik. Nain Ewar Eliwa-ke mua ewar enuma wia arowiya. <sup>7</sup>Ni unowiya nainiw enuma areka. Aria yo naap nefa maakem nain no kema unu-unowa me wue. <sup>8</sup>Ewar ona kookalowa-pa wuuniya, kamenap ekapep kaaneke ikiwiya nain me amisaren. Wuuniya nain muutiw miiminan. Ne wi mua Ewar Eliwa-pa enuma arowa nain pun kakeniw naap.”

<sup>9</sup>Naeya Nikodemus-ke maakek, “Sa, yo nefar kema suuwiyem-na me pepep.” <sup>10</sup>Naeya maakek, “No wi Isrel somek mua maneka-ke, nain no kema-ko me pukon-i? <sup>11</sup>Yo makena nefa maakiyem, i maa amisarep aakunimik ne maa urufap nia maakimik, nain opora-ko me yiar miimiman. <sup>12</sup>Ne yo miiwa-pa maa imenariya nain nia maakiyem nain makena-ke me efa naiman. Ne iinan maa unowa nia maakinenna efa miimowen-i? <sup>13</sup>Mua kuisow owow iinan-ko me urupok, weetak, Mua Muuka waisow iinan-pa ikok fan orop ikua. <sup>14</sup>Iiriw Moses eena epa asia nomon manekiw nan ifa bras-pa sirarep nomokowa-pa wuap fakerap iimarowap-pueya wi mua napum onaiya ikemik nain mokakemi sariarem-ikemik. Ne Mua Muuka pun ikoka sira naap fakerikuan. <sup>15</sup>Naeya wi mua o opora wiar opimik nain Mua Maneka wameiya-pa anane wueliwa ikaikuan.”

<sup>16</sup>Moram Mua Maneka miiw mua manek akena wia kookalep ona Muuka kuisow akena nain sesekak. Naapeya wi mua eena o opora wiar miimap opimik nain wi iiwawun me mesenalikuan, Mua Maneka wameiya-pa anane eliw akena ikaikuan. <sup>17</sup>Moram Mua Maneka ona Muuka sesekak nain me miiw mua wia mekawap wia samorowa nain orok, weetak. Os-ke orop wia aawinok naep sesekak. <sup>18</sup>Naeya wi mua o opora wiar opimik nain Mua Maneka-ke pina me wiar kema suuweya opora-pa me arikuan. Ne wi mua o opora me wiar opimik nain wiimar pina wiar ookami yo opora-pa efar ikaikuan maek. Moram wi Muuka kuisow nain opora me wiar opamik. <sup>19</sup>Mua wia mekawowa

onoma feenap, parina iiriw orop miiwa-pa ikua, nain wi mua-ke parina nain mikikira iwemi epa kokoma-pa ikowa kookalimik. Moram wi sira samo-samora onimik. <sup>20</sup>Ne wi mua eena pina onimik nain epa kokoma-pa ikaiyen naimik, moram wi sira samora onimik nain ariman me yiar arinok naep parina-pa ikowa nain mia fifimik. <sup>21</sup>Ne wi sira makena kookalep onimik nain parina aawimik. Feenap maimik, i sira makena onimik nain Mua Maneka-ke wia kekanoweya wi sira naap onimik, naap yia mauk naep naap onimik.

#### Yon-ke Yeesus ariman maek

<sup>22</sup>Aria naap ikok Yeesus ona teeria unowiya Yuudia kame ikiwemik. Ikiwep lawiliw nan ikok emeria mua eka-pa wia yasuwam-ikua. <sup>23</sup>Ne Yon pun naap, Aionon owowa eka-pa wia yasuwam-ikua, owowa nain Salim mamaiya-pa ikua. Eka unowa kame nan ikomakek, naapeya emeria mua o wiar ikiwiwkin wia yasuwam-ikua. <sup>24</sup>Iir nain Yon koorapa me wuowa ikemik. <sup>25</sup>Ne iir oko-pa wia yasuwowa sira muuta nain Yon teeria-ke Yuuda mua oko wameiya aakunemi oporiw irakemik. <sup>26</sup>Ne Yon teeria-ke ikip Yon maakemik, “Somek mua, iiriw mua eena ikos Yodan eka kame okaiwi-pa ikeman nain pun aakisa eka-pa wia yasuwam-ikaiya, mua no maem-ikon nain. Mua unowiya maneka o wiar ikiwem-ikaimik.”

<sup>27</sup>Ne Yon-ke wia maakek, “Mua onaiw maa naap onowa me pepep, Mua Maneka-ke me pepekiminon-na maa sira feenap nain me oninon. <sup>28</sup>Ni iiriw feenap maemkun miimaman, ‘Yo me Krais-ke, yo Mua Maneka-ke efa sesekeya ekapem, ne mua makena murariya.’ <sup>29</sup>Sira feenap saarik, mua-ko emeria aawinon-na aria mua nain maneka-ke. Ne mua nain aakunem-ikaeya ona womar eliw opora wiar miimap wiar kemelinon. Yo sira naapiw aakisa manek akena kemeliyem. <sup>30</sup>O maneka-ke, ne o unuma ikoka manekarem-ikainon, yo weetak, o tepak-pa wiar ikainen,” naap maek.

<sup>31</sup>Aria mua eena iinan-pa orok nain-ke mua unowa wia nomakek ne mua eena miiwa-pa imenarek nain miiw fain mua-ke, naeya miiw maa muutitik nain aakuniya. Ne mua eena owow iinan-pa orok nain-ke maa unowa onamiariya. <sup>32</sup>Maa urufap opora miimap maiya, nain wi mua-ke opora me wiar miimimik. <sup>33</sup>Mua eena opora wiar miimiya nain, Mua Maneka maken akena-ke naiya. <sup>34</sup>Moram mua eena Mua Maneka-ke sesekeya ekapok nain Ewar me elu muuta iwok, manek akena iwok, naapeya o opora maomiya. <sup>35</sup>Wiawi-ke ona Muuka kookalep maa unowa urufowa nain kekanowa iwok. <sup>36</sup>Naeya mua eena Muuka opora wiar miimap opiya nain anane eliwa ikainon. Ne mua opora me wiar miimiya nain weetak. Moram Mua Maneka urom sirirowa naap wiar ikainon.

#### Yeesus Samaria emeria opora maakek

**4** <sup>1-2</sup>Aria Yeesus Yon nomakep mua unow akena wia yasuwam-ikua. Yeesus ona weetak, makena ona teeria-ke wia yasuwam-ikemik. Ne

pun mua unowa o ookamik nain meta manekareya wi Farisi miimamik. <sup>3-4</sup>Ne Yeesus naap miimap Yuudia piipuap nainiw kirep Galili ikiwok. Ikiwemi Samaria kame-pa naap ikiwok.

<sup>5</sup>Ikiwemi owowa Sikar naimik nan fuunek. Miiw ara oko iiriw ekera Yekop-ke ona muuka Yosep iwok, epa nain Sikar mamaiya-pa ikua. <sup>6</sup>Eka unawera iiriw eena Yekop kuak nain pun nan ikua. Aria unun ama naeya Yeesus era epasia soomarek nain mia sanumarep eka unawera-pa nan pokap ikua.

<sup>7</sup>Nan pokap ikaeya Samaria owow emeria-ko eka uninen naep ekapok. Eka unem-ikaeya maakek, “Sira eliwa, yo eka-ko unep enake.” <sup>8</sup>Ne Yeesus ona waisow ikok naap maakek, ona teeria-na maa enowa-ko sesenaru naep Sikar owowa orop ikemik.

<sup>9</sup>Naeya emeria nain-ke maakek, “No Yuuda-ke, ne yo Samaria-ke, moram yo eka-ko enake efa naakin?”<sup>a</sup> Moram iir nain wi Yuuda wi Samaria wiam miatinemik. <sup>10</sup>Ne Yeesus-ke maakek, “No Mua Maneka maa eliwa nia sesekomak nain amisarekan-na, ne pun mua eena eka nefa maakiya nain amisarekan-na o maakeya eka anane naap ikaiya nain eliw nenakinon.” <sup>11</sup>Naeya emeria nain-ke maakek, “Maneka, no eka unomowa nain amina weetak, ne eka fain irauwa akena. No eka anane naap ikaiya nain kaaneke aawinan? <sup>12</sup>Yiena nembesir Yekop-ke eka unawera fain kuak. Ona, ne ona muuk unowa, ne maa eneka pun, wi unowiya iiriw eka fain enem-ikemik, ekapep aakisa. Ne nos-ke Yekop nomakep maneka arekam naep-i?” <sup>13</sup>Naeya maakek, “Wi mua eka fain enimimik nain ikoka nainiw kema enekarem-ikaikuan. <sup>14</sup>Ne mua eena yo eka onakiyem nain ikoka nainiw kema me enekarion, weetak. Eka nain eka ona saarik kema-pa wiar suuw-urupem-ikaeya Mua Maneka wameiya anane eliwa ikainon.” <sup>15</sup>Naeya emeria nain-ke maakek, “Maneka, yo eka naap nain-ko enake. Ne yo kema enekarep anane ekapep eka fain me unem-ikainen.”

<sup>16</sup>Naap maeya maakek, “No ikiwep nena mua aawep ikos ekapeka.” <sup>17</sup>Ne emeria nain-ke maakek, “Yo mua marew ikem.” Naap maeya maakek, “No pepep maen, no mua marew. <sup>18</sup>Makena, no mua ikur iiriw wia aawon. Ne aakisa mua wameiya ikon nain me nena mua makena-ke. No makena maen.” <sup>19</sup>Naeya emeria nain-ke maakek, “Maneka, aakisa yo amisarem, no profet-ke. <sup>20</sup>I Samaria iiriw yiena kae unowa anane ema eenan wiam fiirimep Mua Maneka lotu arem-ikemik.<sup>b</sup> Nain ni Yuuda-ke maiman, Mua Maneka lotu arowa epa Yerusalem owowa-pa muutiw ikua. Naap-i?”

---

<sup>a</sup> 4.9 Wi Yuuda ne wi Samaria iiriw teeria kuisow ikemik. Ne wi Asiria-ke ekapep owowa wiar samorami wi teeria Samaria-pa ikemik nain papako wia aawep ikiwemik. Naap ikok wi owow oko-ke ekapep miiwa nan taanemik ne wiipa wiar aawemik. Naapeya wi Yuudia-pa ikemik nain maemik, wi Samaria me i aka kakeniw-ke. Naemi wiamiya ikowa miatinemik. <sup>b</sup> 4.20 Wi Samaria Gerisim ema-pa Mua Maneka lotu onam-ikemik.



<sup>21</sup>Ne Yeesus-ke maakek, “Aite, yo opora efar miime. Epa fan kereriya, Mua Maneka lotu arowa nain ni ema neeke me onowen ne Yerusalem owowa pun me onikuan. <sup>22</sup>Ni Samaria-na o eena me baliwep amisareman nain lotu oniman. Ne i makena, i o amisaremik nain lotu onimik. Moram Mua Maneka yia aawowa maek nain i Yuuda teeria-pa yiar imenarek. <sup>23</sup>Epa nan kereriya, nain aakisa fanek, wi mua opor makena maemi Ewar Eliwa kekanowa-pa Mua Maneka lotu arikuan. Lotu sira eena Mua Maneka kookaliya nain. <sup>24</sup>Mua Maneka-na ewar-ke, naeya wi o lotu onimik nain opor makena maemi Ewar Eliwa kekanowa-pa lotu onam-ikaikuan.” <sup>25</sup>Ne emeria nain-ke maakek, “Yo amisarem, Mesaiya eena Kraiis naimik nain ikoka ekapinon. Os-ke ekapemi maa unowa yia maakinon.” <sup>26</sup>Ne Yeesus-ke maakek, “Mua nain-na makena yo fanem. Yo mua nain-ke nefamiya aakunem-ikaiyem.”

<sup>27</sup>Yeesus emeria nain mamaiya aakunem-ikaeya ona teeria iiriw owowa ekamik nain kiiriw ekapemik. Ekapep naap urufap kema unu-unowa wuamik. Nain feenap nokaru naep onamik-na me nokaremik, “No maa mauwa nokarin?” e, “No oram emeria nain wameiya aakunin?” <sup>28-29</sup>Aria emeria nain eka amina nan wuap-puap ikiwep owow mua wia maakek, “Nee, ni ekapep mua fain-ko urufeka. Yo maa muutitik iiriw onam nain os-ke ariman efa maek. O Mesaiya-ki e mua kamenap nain-ke?” <sup>30</sup>Naeya onowiya iikirap emeria nain ookap Yeesus wiar ekapemik.

<sup>31</sup>Aria emeria nain ikiwep ikaeya ona teeria-ke maakemik, “Somek mua, no maa-ko enime.” <sup>32</sup>Naap maakiwkin wia maakek, “Yo maa enowa efar ikua nain ni me efar amisareman.” <sup>33</sup>Naeya wi kema unu-unowa wuami wi-wieniwi maemik, “Aa, mua oko-ke maa enowa-ko pekapep onakemik-i kamenion.” <sup>34</sup>Naiwkin wia maakek, “Weetak, yo maa enowa feenap maiyem, mua eena efa sesekak nain kookalowa ookami o uuwowa iiwawun welawomakam naep. <sup>35</sup>Ni feenap maiman, ‘Siiwa erepam ikiweya maa enowa perekimik.’ Naap-i? Nain yos-ke feenap nia maakiyem, ni mokoka wilinep baliwep urufeka. Manin maa enowa iiriw parewok. <sup>36</sup>Mua eena maa enowa perekap koorapa-sepa wuiya, mua nain o kiripowa wiar ikua. Ne maa enowa koorapa-sepa wuimik nain feenap, wi mua, Mua Maneka pika kemena ikiwep anane eliwa ikaimik nain wia maiyem. Mua maa enowa upiya nainiya, ne mua maa enowa perekiya nain, wiam erup eliw kemelikuan. <sup>37</sup>Naapeya opora fain makena, ‘Mua oko-ke maa upowa isakiya ne mua oko-ke maa enowa perekiya.’ <sup>38</sup>Ni maa enowa me upeman nain yos-ke maa enowa perekowa nia sesekam. Mua papako-ke iiriw oospem maa upowa isakemik, ne ni aakisa perekiman.” Naap wia maakek.

<sup>39</sup>Aria Samaria owow emeria nain-ke owow emeria mua unowa wia maakek, “Yo maa muutitik iiriw onam nain ariman efa maek.” Naapeya wi Yeesus opora wiar opamik. <sup>40</sup>Ne o wiar ekapep yiamiya ikainok

naep kekanemik. Naapeya ekap fofa erup nan wiamiya ikua. <sup>41</sup>Nan ikok opora wia maakem-ikua nain unow akena opora wiar opamik. <sup>42</sup>Ne emerua nain maakemik, “I me no maen nain muutiwi miimap opora wiar opimik, weetak. I yiena kakeniw ifana-pa wiar miimamik. Naeya i aakisa amisaremik, mua fain makena-ke, os-ke miw mua yia aawow mua-ke.”

#### Yeesus woos mua muuka wiar saliwak

<sup>43</sup>Aria fofa erup weesereya Yeesus owowa nain piipuap Galili ikiwok. <sup>44</sup>Moram ona wame maemi maek, “Profet ona owow mua-ke ekima me opimik.” <sup>45</sup>Nain wi Galili unowa iiriw Pasowa maapora urufowa naep Yerusalem ikiwep nan ikaiwkin maa miililina oneya wiar urufamik. Naapeya Galili ikiwok nain kemelap aawemik.

<sup>46-47</sup>Aria nan ikok kiiriw Kaana owowa ikiwok, owowa eena mokomokoka maa miililina onami eka wain onak, owowa nain. Ne anim onom mua-ko Kapeneam owowa-pa ikaiya. Mua nain muuka-ke wiar napumarep umekam naep onam-ikua. Aria Yeesus Galili ekapok nain miimap muuka saliwominok naep ikip Yeesus nokarek. <sup>48</sup>Nokareya maakek, “Ni, yo maa miililina onamkun efar urufap opora efar opiman naiman, ne me urufiman nain weetak.” <sup>49</sup>Ne mua nain-ke maakek, “Maneka, ewur akena yooke aa, oko yo muuka efar uminon.” <sup>50</sup>Naeya maakek, “No eliw ikiwinan, no muuka nefar sariarinon.” Ne opora wiar miimap makena efa maakiya naep ikiwok. <sup>51</sup>Ikim-ikok ona uuwow mua wia mirowak, ne wis-ke maakemik, “Oo, no muuka nefar sariarek.” <sup>52</sup>Ne wia nokarek, “Ama kamin napuma wiar sariarek?” Naeya maakemik, “Inon amirika ama kuisow naap.” <sup>53</sup>Naap maiwkin kema suuwak, inon amirika ama pepep naap Yeesus-ke maakek, “No muuka nefar sariarinon.” Ne aria naap furewap ona ne ona teeria unowiya Yeesus opora wiar opamik. <sup>54</sup>Aria Yeesus Yuudia kame piipuap Galili ekapep iir nain maa miililina nain oneya aakisa erup arek.

#### Yeesus Betesda eka irauwa-pa mua oko saliwak

**5** <sup>1</sup>Aria Yeesus nan ikaeya wi Yuuda lotu fofa maneka oko kererek. Ne iir nain Yerusalem ikiwok. <sup>2</sup>Owowa nain pona-pa Sipsip Omopora naimik, epa nain eka irauwa oko nan ikua. Wi Iibru opora-pa eka nain Betesda naimik. Eka irauwa nain soomarow era saawirinowa kua ikur ikua. Ne iinan kuasura onaiya ikua. <sup>3-4</sup>Wi napum mua unow akena, mua mokok opa, meren damola ne wapena merena kuumaremik, wi naap nan ikomakemik. [Moram iir kui-kuisow Mua Maneka ensel-ke orop eka nain ararumeya bulubul imenareya urufap napum mua oraimik, ne mua ookikir oraiya nain-ke sariarinon. Wi naap maemik.] <sup>5</sup>Ne mua napuma oko-ko nan ikua, mokoma ten arow, ikur okaiwi-pa arow napuma nain aawep inepiw ikaiya. <sup>6</sup>Yeesus urupemi mua nain naap urufap kema-pa

maek, aa, napuma fain iiriw ekera aawok. Neemi ekap miir onoma-pa nokarek, “Nee, no kamenap? Sariarekam naep-i?” <sup>7</sup>Naeya mua nain-ke maakek, “Oo saria, mua naareke efa asipap efa aawep eka bulubul wuiya nain neeke efa porainon? Yo kekanep orekam naep oniyem-na weetak, mua oko-ke efa nomakemi wi kiikir oraimik.” <sup>8</sup>Naeya maakek, “No iikire, iikirap nena inow maa unowa opap soomare.” <sup>9</sup>Naap maakeya mua nain sariarep iikirap ona maa unowa opap soomarek. Yeesus nain onak nain Sabat fofa-pa onak.

<sup>10</sup>Naapeya wi Yuuda-ke mua nain urufap maakemik, “Aakisa Sabat-ke. No moram sira puukap nena inow maa opap soomarin?” <sup>11</sup>Naap maakiwkin wia maakek, “Mua yo efa saliwak nain-ke efa maakeya yena inow maa unowa opap soomariyem.” <sup>12</sup>Ne nokaremik, “Mua naareke naap onowa nefa suuwak?” <sup>13</sup>Mua nain opora-ko me wia kiripomak, moram Yeesus unuma me wiar amisarek, ne iir nain mua yakeyak manekiya Yeesus wi wia bilikaremi ikiwok. <sup>14</sup>Naap ikok Yeesus tempel pika kemena ikiwok-na mua nain urufak. Urufap maakek, “No sariaren. No pina onowa piipue, oko wiimar maa samor akena aawinan.” <sup>15</sup>Are nan Yeesus amisarek. Ne ikiwep wi Yuuda wia maakek, “Mua efa saliwak nain Yeesus-ke.”

<sup>16</sup>Naapeya iir nain wi kema bagiwirap Yeesus samorowa onoma wuamik. Moram o Sabat-pa sira nain onak. <sup>17</sup>Wi naap maiwkin Yeesus-ke wia maakek, “Yena Auwa anane maneka naap uuwam-ikaiya. Ne yos pun naap uuwam-ikainen.” <sup>18</sup>Naap maeya wi Yuuda o ifakimu naep kekanemik. Moram me Sabat sira muutiw wiar puukak. O feenap maiya pun, “Mua Maneka yena Auwa-ke,” naap maiya nain Mua Maneka saarik arekam naep oniya. Opor ara nain muuta o ifakimu naep onamik.

### **Mua Maneka Muuka uuwowa onowa unuma onaiya ikua**

<sup>19</sup>Ne Yeesus-ke wia maakek, “Yo makena nia maakiyem, Muuka ona waisow kema-pa maa me oniya, weetak. Wiawi maa oniya nain wiar urufap oniya. Wiawi maa kamenap oniya, nain muuka pun naap akena oniya. <sup>20</sup>Moram Wiawi ona Muuka kookalep maa unowa ona oniya nain ofakowiya. Ikoka maa mane-maneka ofakoweya wiar urufap kakaowen. <sup>21</sup>Feenap, wi mua umimik nain Wiawi-ke wia iikirowiya. Ne Muuka pun naap, mua eena wia kookalep sira naap wia oniya. <sup>22</sup>Wiawi mua kuisow-ko me wia mekawiya. Wia mekawowa kekanowa nain Muuka iwok. <sup>23</sup>Naapeya mua unowa eliw Muuka unuma pirikuan, Wiawi unuma pirimik naap. Mua eena Muuka unuma me piriya nain Wiawi pun unuma me wiar piriya, o eena sesekak nain. <sup>24</sup>Yo makena nia maakiyem. Mua eena yo opora efar miimiya, ne o eena efa sesekeya ekapem nain pun opora wiar opiya nain umowa iiriw nomakep anane eliwa ikowa nan ikua. Naapeya opora-pa me arinon. Neemi me samor aawinan, anane

eliwa ikainon. <sup>25</sup>Naeya yo feenap nia maakiyem, epa nan kereriya, nain aakisa fanek, wi mua eena umowa-ke wia opap ikua nain Mua Maneka Muuka iwakara wiar miimimik. Ne wi opora wiar miimap opimik nain wueliw ikaikuan. <sup>26</sup>Eliwa ikowa nain onoma Auwa wiar ikua. Ne ona Muuka kekanowa nain iweya os pun wiar ikua. <sup>27</sup>O Mua Muukiya wia mekawowa kekanowa nain iwok. <sup>28-29</sup>Aria ni opora fain miimap kema unu-unowa me wueka. Feenap, epa fan weeserikua, wi iiriw umemik nain o iwakara wiar miimap eruwa-pa iikirikuan. Wi iikirap iiriw eena sira eliwa onam-ikemik nain eliwa ikaikuan. Ne wi sira samora miiwa-pa onam-ikemik nain samor aawikuan.”

### **Yeesus ona kekanowa-pa uuwiya nain wame maek**

<sup>30</sup>“Aria yo yena kema-pa maa me oniyem. Auwa opora wiar miimap kakeniw naap wia mekawayem. Moram yo me yena kookalowa ookiyem, weetak. O eena efa sesekeya ekapem nain kookalowa wiar ookiyem. <sup>31</sup>Yo yenaiw yame mainen-na, yo maiyem nain eliwi naap maowen, ‘Weetak, no nenaiw main nain me pepeki.’ <sup>32</sup>Nain mua oko nan ikua, os-ke maemi yo efa maiya nain makena. <sup>33</sup>Ne mua papako wia sesekiwkin Yon wiar ikiwemik nain yo efa maemi opor makena wia maakek. <sup>34</sup>Nain Yon yo efa maek nain makena, nain mua opora-ke. Yo fain naep maiyem, ni Yon opora efa maek nain opowen-na Mua Maneka-ke nia aawinon. <sup>35</sup>Yon parina saarik wilinem-ikok ni parina niem-ikua. Nain nis-ke parina nain urufap kemelaman nain parina-pa ikowa nain ewur piipuan.

<sup>36</sup>Ne Yon opora nia maakem-ikua nain maa oko fain-ke wiar nomakek. Feenap, yo mauwow unowa Auwa-ke efa maakeya onami welawiyem fain efar urufap amisarowen, yo mua kamenap nain-ke. Uuwowa efar urufap amisarowen, os-ke efa sesekak. <sup>37</sup>Auwa eena efa sesekak nain pun yo efa maiya. Nain ni iwakara me wiar miimaman, ne miira pun me urufaman, weetak akena. <sup>38</sup>Ne pun mua eena sesekak nain opora me wiar opiman, naapeya o opora ni kema-pa me niar ikaiya. <sup>39-40</sup>Aria ni Mua Maneka opora siisimep-puamik nain urufiman, moram ni kema feenap wuiman, i neeke anane eliwa ikowa sira nain aawimik. Ne opor unowa Mua Maneka opora-pa ikomakek nain yo efa maek, nain ni anane eliwa ikowa aawu naep yo efar ekapowa nain ni weetak, miatiniman.

<sup>41</sup>Wi mua-ke unuma efar pirowa nain me kema suuwiyem, oram-ke. <sup>42</sup>Nain yo nia amisarem, ni Mua Maneka me kookaliman. <sup>43</sup>Yo eena Auwa-ke efa pepekimewa ekapem nain me efa aawiman. Ne mua-ko onaiw wame maiya nain aawiman. <sup>44</sup>Ni miiw mua-ke unuma nia piruk naep oniman. Nain Mua Maneka mua kamenap nia naiya nain me kema suuwiman. Naapeya ni kamenap o opora wiar opowen?

<sup>45</sup>Aria ni sira samora oniman nain wiimar me yos-ke yena Auwa mokok epa-pa opora-pa nia wuinen, weetak. Moses-ke naap nia oninon, o

eena yia asipinon naiman nain-ke opora-pa nia wuinon. <sup>46</sup>O opora wiar opakaman-na yo opora pun efar opakaman. Moram opora siisimok nain yo efa maemi siisimok. <sup>47</sup>Ne ni opora siisimok nain me wiar opiman, naapeya yo opora maiyem nain kamenap efar opowen? Weetak.”

**Yeesus mua tausen ikur maa enowa wienakek**  
(*Matiu 14.13-21, Mak 6.30-44, Luk 9.10-17*)

**6** <sup>1</sup>Aria iir oko-pa Yeesus Galili eka saawirinowa maneka nain kame okaiwi ekak. Eka nain unuma oko Taiberias naimik. <sup>2</sup>O maa miililina onami wi napum mua wia saliwak nain wi urufap yakeyak maneka ookam-miemik. <sup>3</sup>Wi ekap ona teeria onaiya urupep ema muuna-pa pokamik. <sup>4</sup>Iir nain wi Yuuda Pasowa maapora pun mamaiyarek. <sup>5-6</sup>Pokap ikok Yeesus mokoka wuak-na yakeyak maneka wiokap urupem-ikaiwkin wia urufak. Naap wia urufap Filip akimekam naep nokarek, “Nee, i maa enowa kaanek sesenarep wienakiyen noma?” Ne ikoka kamenap onowa nain amisarep ikua. <sup>7</sup>Naeya Filip-ke maakek, “I maamuma andet erup naap emer ikowa sesenarep wienakiyen-na wia pepek erinon-i? Wi wu-wuepap pote pote enimikuan pun me pepek,” naap maek. <sup>8</sup>Ne ona teeria mua oko unuma Andru naimik, Saimon Pita weepe-ke. Os-ke maek, <sup>9</sup>“Takir oko emer ikowa ikur ne mera gelemuta erup wiar ikaeya urufamik. Sa, teeria maneka faa, wienakowa pepek-i?” <sup>10</sup>Naeya wia maakek, “Wi wia maakiwkin sipira-pa pokomakuk.” Ne wia maakiwkin pokamik. Yakeyak maneka nain mua muutiw wia tuunamik. Wia tuunamik nain tausen ikur (5,000) naap.

<sup>11</sup>Wi pokap ikaiwkin Yeesus emer ikowa ikur nain aawep Mua Maneka sira eliwa naakep-puap wu-wuepap sererkap wieya enemik. Ne mera pun sira naapiw onak. Wi enemik enemik wia, maa enowa-keriw arek. <sup>12</sup>Wi enep pepek eriwkin ona teeria wia maakek, “Maa enakiwa kiromakek nain baliweka, me wesusikua.” <sup>13</sup>Emer ikowa enakiwa kireya fiirimemik nain inera ten kuisow nainiw erup taanek.

<sup>14</sup>Ne Yeesus maa miililina naap imeneya wi unowa nain naap urufap maemik, “Aa pepek, Mua Maneka profet miiwa orowa maek nain mua maken akena fanek!” <sup>15</sup>Ne Yeesus kema wiar amisarek, oko wis-ke kekanemi wiena owow saria maneka efa wuikuan, naap naep baurarep ona waisow nainiw ema urupok.

**Yeesus eka iinan-pa soomar-ikiwok**  
(*Matiu 14.22-33, Mak 6.45-52*)

<sup>16-17</sup>Aria urer akena Yeesus ona teeria wiisow Galili eka pona orop wi kiikir aasa aawep kame okaiwi Kapeneam ekam-ikemik. Epa kokomarek, nain Yeesus me kererowa ikua. <sup>18</sup>Wi aasa-pa ekam-ikaiwkin ewar maneka wuunemi ifer umukut onaiya wuam-ikua. <sup>19</sup>Wi ikiwep gone-pa

ariwkin Yeesus wiokami ifer iinan-pa soomar-ikim-ikaeya urufap keker opamik. <sup>20</sup>Keker opiwkin wia maakek, “Ni me keker opaka, yos-ke!” <sup>21</sup>Naap maeya wi kemelami o opap purup aasa-pa wuamik. Wuiwkin ewur kuisow kame okaiwi-pa fuunemik.

<sup>22</sup>Ne uurik ona wi teeria eka kame okaiwi-pa ikemik nain wi kema naap maemik, iiriw aasa kuisow muuta fan ikua nain ona teeria-ke aawemik. Ne o me wiokak, wi wiisow ikiwemik, naap maemik. <sup>23</sup>Ne aasa papako Taiberias piipup ikiwep epa nan urupap ikemik. Epa eena inon fan yiena Maneka Mua Maneka sira eliwa naakep maa wienakek nain. <sup>24</sup>Yaakek maneka Yeesus ona teeria onaiya nan me wia urufap o akupami aasa nain wiar irap Kapeneam ekamik. <sup>25</sup>Ekap nan imenap nokaremik, “Nee, somek mua, no kamenap ekapon?” <sup>26</sup>Ne wia maakek, “Yo makena nia maakiyem, ni me yo maa miililina onamkun yo efa kema suuwap kema fufurarep nain kookalep efa akupiman, weetak. Ni maa enep uroma taanow muuta nain yo efa akupam-miawiman. <sup>27</sup>Nain ni maa enowa ewur samorariya nain me senam kema suuwap uufuneka. Mua Muuka opora nia maakiya nain ni ookami anane epa eliwa-pa ikowen. Nain maa enowa saarik kookalep aawem-ikeka. Moram Auwa Maneka ona uuwowa nain Muuka iwemi kekanowa onaiya iwok.” <sup>28</sup>Ne wis-ke maakemik, “I sira kamenap onap Mua Maneka uuwowa onomiyen?” <sup>29</sup>Ne wia maakek, “Mua Maneka uuwowa feenap, mua eena sesekak nain opora wiar opaka.”

<sup>30</sup>Naeya maakemik, “Naapeya-na no maa miililina-ko oneya i urufap makena naep no opora nefar opiyen. No maa miililina sira kain oninan? <sup>31</sup>Iiriw yiena nembesir epa asia nomon manekiw nan ikiwem-ikok Moses-ke Mua Maneka fareya maa enowa maana naimik nain wia sesekomaya enem-ikemik, eena Mua Maneka opora maek naap,

‘Os-ke maa enowa owow iinan-pa wia sesekomaya enemik.’”

*(Eksodas 16.4, Someka 78.24)*

Naap maakemik. <sup>32</sup>Ne Yeesus-ke wia maakek, “Yo makena nia maakiyem, enowa nain me Moses-ke wienakek, weetak. Yena Auwa-ke maa enowa akena owow iinan-pa ikua nain nia sesekomiya. <sup>33</sup>Mua Maneka maa enowa feenap nain nia sesekomiya, maa enowa eena iinan-pa orok nain ni miiw mua enep anane eliwa ikowen.” <sup>34</sup>Naeya maakemik, “Aa-na, i maa enowa naap nain yienakem-ike.” <sup>35</sup>Ne wia maakek, “Maa enowa nain makena yos, eena enep anane eliwa ikowa nain. Wi mua yo efar ekapimik nain wi wuailowa marew. Ne yo opora efar opimik nain kema enekarowa marew. <sup>36</sup>Nain yo iiriw nia maakem, ni efa urufiman fain, yo opora me efar opiman. <sup>37</sup>Wi mua eena Auwa-ke yiiya nain yo efar epikuan, yo me wia iirarinen. <sup>38</sup>Moram, yo miiwa orom nain me yena kookalowa ookowa nain orom, o eena efa sesekak nain kookalowa wiar ookowa naep orom. <sup>39</sup>Ne ona kookalowa nain feenap, emerua mua unowa

yiiya nain yo mua kuisow-ko me piipuinen. Ikoka miiwa weeserow epa-pa unowiya wia iikirowinen. <sup>40</sup>Yena Auwa kookaliya nain feenap, wi Muuka urufap opora wiar opimik nain anane eliwa ikaikuan. Ne wiimar miiwa weeserow epa-pa yena wia iikirowinen.”

<sup>41-42</sup>Aria Yeesus-ke naap wame maeya wi Yuuda-ke nain miimap murarow opora onami maemik, “O Yeesus-ke, Yosep muuka-ke. I wiawi onak wiar amisaremik. Ne moram ‘Yo owow iinan-pa orom’ naiya!”

<sup>43</sup>Naap aakunem-ikaiwkin wia maakek, “Ni naap efa maiman nain neek ikainok. <sup>44</sup>Mua kuisow onaiw yo me efar ekapinon, weetak. Auwa efa sesekak nain-ke mua wia mufeya yo efar ekapikuan. Ne miiwa weeserow epa-pa yena wia iikirowinen. <sup>45</sup>Ne wi profet-ke maiwkin siisimep-puamik, feenap,

‘Wi unowa nain ikoka Mua Maneka-ke amisa wiinon.’ (*Aisaiya 54.13*)  
O mua eena Auwa opora wiar miimap amisa wiar aawiya nain-ke yo efar ekapinon.

<sup>46</sup>Makena, mua kuisow Auwa-ko me urufak, weetak. O mua eena Wiawi mamaiya-pa ikok ekapok nain makena, Mua Maneka urufak. <sup>47</sup>Yo makena nia maakiyem, mua eena yo opora efar opiya nain anane eliwa ikainon. <sup>48</sup>Anane eliwa ikowa onoma yos, nain maa enowa makena-ke naiyem. <sup>49</sup>Makena, niena nembesir unowa epa asia nomon manekiw nan yiwem-ikok wuailep maana enemik, nain wi iiriw umemik. <sup>50</sup>Ne maa enowa oko maem fain iinan-pa orok, mua eena maa enowa fain enep me uminok naep. <sup>51</sup>Enowa fain enep anane eliwa ikowa nain, makena yos, maa enowa eena owow iinan-pa orok nain. Wi maa enowa fain enimimik nain, wi anane eliwa ikaikuan. Maa enowa nain yena mia yame maiyem, miiw mua unowa eliwa ikauk naep yena yame wuami uminen,” naap wia maakek.

<sup>52</sup>Naeya wi Yuuda-ke wi-wieniwi oporiw irakemi maemik, “Nee, mua fain ona mia oposia enowa yia maakiya nain kamenap noma?”

<sup>53</sup>Naeya wia maakek, “Yo makena nia maakiyem, ni Mua Muuka mia oposia ne aka me wiar enimowen-na ni anane eliwa ikowa nain naap me ikowen. <sup>54</sup>Ne wi mua yo mia oposia ne aka efar enimimik nain wi anane eliwa ikaikuan, ne wiimar miiwa weeserow epa-pa yena wia iikirowinen. <sup>55</sup>Moram, yena mia oposia-na maa enowa akena-ke ne yena aka pun eka makena-ke. <sup>56</sup>Mua eena yo mia oposia ne aka efar enimiya nain yo efamiya ikaiya, ne yo o wameiya ikaiyem. <sup>57</sup>Feenap, Mua Maneka anane ikaiya nain-ke efa sesekak. Ne os-ke ikaeya yo ikem. Nain kakeniw naap, yo ikem, naapeya mua eena yo mia oposia efa enimiya nain os pun ikainon. <sup>58</sup>Enowa fain makena, owow iinan-pa orok. Iiriw yiena nembesir unowa maa enowa maana naimik nain enemik, nain umurumemik. Ne enowa fain maiyem nain makena-ke, ne wi enimimik nain anane eliwa ikaikuan.” <sup>59</sup>Kapeneam lotu koora-pa suule wiemi opora naap wia maakem-ikua.

### Mua papako Yeesus ookam-ikok piipuamik

<sup>60</sup>Aria ona teeria maneka nain wi mua unowa-ke naap miimap maemik, “Nee, opora naap-ko ikua-i ya? Aa, i opora eliw marew nain moram wiar miimiyen? Kama yia mikiya.” <sup>61</sup>Wi naap maemi muninem-ikemik nain, Yeesus wiar amisarek. Ne wia maakek, “Ni opora nain-ke uroma nia mikeya opora eliw marew efar naiman. <sup>62</sup>Ne Mua Muuka ona iiriw ikua neeke kiiriw urupeya urufap ni kamenap-ko maowen-yon? <sup>63</sup>Ewar Eliwa kekanowa-pa Mua Maneka wameiya ikok anane eliwa ikaikuan. Wi mua wieniw me pepek. Opora eena yo nia maakem nain Ewar onaiya ikua, ne anane eliwa ikowa nain aawowa-ke. <sup>64</sup>Nain ni mua papako opora me efar opiman.” Naap maek, moram wi mua eena opora me wiar opamik nain o uuwowa onoma wuak nain iiriw naap wia amisarek. Ne pun mua eena wi iiwua wapena-pa wiar wuowa nain amisarek. <sup>65</sup>Ne wia maakek, “Yo naapeya nia maakem, mua wieniw yo efar ekapowa me pepek, makena, Auwa ona kekanowa wieya eliw yo efar ekapikuan.” <sup>66</sup>Ne naap wia maakeya mua unowa o ookam-miemik nain iir nain piipuamik. <sup>67</sup>Wi ikiwiwkin ona teeria mua ten kuisow erup nain wia nokarek, “Ne nis pun efa piipu naep-i?” <sup>68</sup>Naeya Saimon Pita-ke maakek, “Sa, Maneka, i mua naarew wiar ikiwiyen? Anane eliwa ikowa opora onoma nos. <sup>69</sup>I opora iiriw nefar opamik ne pun i amisaremik, makena no Mua Maneka-ke nefa pepekimep nefa sesekeya ekapon.” <sup>70</sup>Naeya maek, “Makena, yo mua ten kuisow erup nia aawem. Nain mua kuisow Satan-ke ikua!” <sup>71</sup>O Yuudas maemi naap maek. Yuudas-na Saimon Iskariot muuka-ke. Ikoka os-ke Yeesus wi iiwua wapena-pa wiar wuinon.

### Yeesus ona wiamun unow onaiya maapora ikiwowa aakunemik

**7** <sup>1</sup>Aria Yeesus Yuudia kame ikiwowa nain wi Yuuda amis mua-ke o ifakimowa maemik. Naapeya Galili kame-pa nan-pariw ikok uuwam-miek. <sup>2</sup>Ne wi Yuuda maapora oko, maa esimsa kuowa maapora naimik nain wiar mamaiyarek. <sup>3</sup>Ne Yeesus ona wiamun unowa-ke maakemik, “No Yuudia kame ikiwep maa miililina oneya nena teeria unowa nefar urufuk. <sup>4</sup>Mua-ko eena maa miililina onowa ariman efar urufap amisaruk naep maa kokot me oniya. Naapeya no ikip maa ariman oneya miiw unowa mua nefar urufuk.” <sup>5</sup>Ona wiamun unowa opora me wiar opam-ikemik, naapeya naap maakemik. <sup>6</sup>Ne wia maakek, “Yo epa eewuar. Ni epa anane naap ikaiya. <sup>7</sup>Miiw mua unowa ni me nia iiwuarimik, weetak, yo efa iiwuarimik. Moram sira samora onimik nain yos-ke ariman wiar wuami maiyem. <sup>8</sup>Ni eliw ikiwep maapora urufeka. Yo epa eewuar, naeya me ikiwinen.” <sup>9</sup>Naap wia maakep ona Galili-pa nan ikua.

### Yeesus pun maapora nain ikiwok

<sup>10</sup>Aria ona wiamun unowa ikiwep Yerusalem-pa nan ikaiwkin o aakisa fan ikiwok. Ariman me ikiwok, kokot ikiwok. <sup>11</sup>Iir nain wi Yuuda o



akupami wiam nokarem-miemik, “Nee, mua nain-ko ekapok-i?” <sup>12</sup>O muuta nain senam aakunemik. Papako-ke maemik, “O mua eliwa-ke,” ne papako-ke maemik, “Weetak, os-ke wia ekerami era samora-pa wia pikiwiya.” <sup>13</sup>Nain ariman me maem-miemik, moram wi Yuuda woos mua yia samorikuan naep wia keker opamik.

<sup>14</sup>Maapora gone-pa ikaiwkin Yeesus ikip fuunep tempel urupep pika kemena-pa opora wia maakem-ikua. <sup>15</sup>Aria wi Yuuda naap urufap kakaemi maemik, “Nee, mua fain suule-ko me ikiwok, o amis maneka naap nain kaanek aawok?” <sup>16</sup>Ne wia maakek, “Yo amisa fain me yena kakeniw amisa-ke, weetak. Mua eena efa sesekek nain-ke yiek. <sup>17</sup>Yo opora fain Mua Maneka wiar ekapok-i e oram yena kema-pa maiyem, nain mua eena Mua Maneka kookalowa ookiyem naiya nain efar furewap makena mainon. <sup>18</sup>Mua ona wame purupekam naep opor unowa ona kema-pa mainon. Ne mua eena o sesekeya ekapok nain unuma wiar pirowa kookaliya nain mua makena-ke, wadol marew. <sup>19</sup>Ni Moses sira-ko me niek-i? Nain ni unowiya o sira wuomakek nain iiwawun-ko wiar ookiman-i? Naap nain ni moram yo efa ifakimu naep oniman?” <sup>20</sup>Naeya maakemik, “No sawur-ke nefa anirawamik. Mua naareke nefa ifakimekam naep oniya?” <sup>21</sup>Ne wia maakek, “Yo maa miililina kuisow eena onam nain ni urufap kakaiman. <sup>22</sup>Ni fain kema suuweka, Moses-ke mia kanima puukowa sira nain nieya ni Sabat epa pun muuka mia kanima wia puukiman. Nain me Moses-ke sira nain imenak, sira nain iiriw nembesir-pa ekapok. <sup>23</sup>Naapeya ni Moses sira me wiar puukiyen naep Sabat-pa mia kanima eliw puukiyen naiman. Nain yo Sabat-pa mua wia saliwamkun ni moram efa amukariman? <sup>24</sup>Ni oram mokoka-pa urufap me maeka. Ni maa baliwep kema suuwap makena-ke naep maeka.” Naap maek.

### **Yeesus makena Krais-ki e weetak**

<sup>25</sup>Aria wi Yerusalem mua papako-ke maemik, “Nee, mua fain ifakimu naep maimik nain faneka ya. <sup>26</sup>Ne mua unow mokoka-pa opora maeya mua kuisow o-ko me kiripomimik. Wi anim onoma pun o makena Krais-ke naimik-yon-i? <sup>27</sup>Ne o epa ekapok nain i amisaremik. Nain ikoka Krais epa ekapiya nain mua kuisow me amisariyen,” naap maemik. <sup>28</sup>Aria Yeesus tempel pika kemena-pa emeria mua opora wia maakemi kerew farep maek, “Ae, ni yo efa amisareman, ne epa ekapem nain pun efa amisareman. Naap-i? Nain yo me yenaiw ekapep fan ikem! O eena efa sesekek nain opor makena onoma os. Ni o me amisareman, <sup>29</sup>nain yos-ke amisarem. Moram o wiar ikemkun ona efa sesekeya fan ekapem,” naap maek. <sup>30</sup>Naap maeya opu naep uufunemik, nain o epa eewuar ikaeya me opamik. <sup>31</sup>Ne iir nain pun mua unow akena o makena wiar naemik. Neemi maemik, “Mua fain maa miililina unowa oniya noma. Ne Krais

ikoka ekapowa naimik nain o nomakep unow akena oninon-i?”<sup>32</sup> Naap maem-ikaiwkin wi Farisi-ke wia miimamik. Naapeya wi pris woos mua wiamiya aakunep tempel ami mua wia sesekamik, wi ikiwep opuk naep.

<sup>33</sup>Aria Yeesus aakunemi feenap wia maakek, “Yo epa maala ni niamiya me ikainen. Yo o eena efa sesekak nain wiar ikiwowa-ke. <sup>34</sup>Iir nain yo efa akupowen-na wia, me efa imenowen, ne epa yo ikiwep ikainen nain ni kamenap ikiwowa.” <sup>35</sup>Ne wi Yuuda-ke maemik, “Nee, kaanek ikiweya i me urufiyen yia naiya noma? I Yuuda unowa eena Grik owow unowa-pa ikemik nain neek wiar ikiwep Mua Maneka opora wia maakekam naep naap maiya-i? <sup>36</sup>Kamenap maemi feenap maek, ‘Ni yo efa akupowen-na wia, me efa imenowen. Ne yo ikip ikaiyem nain ni ikiwowa me pepe.’” Naap maem-ikemik.

<sup>37</sup>Aria maapora nain weeserow fofa kererek, fofa nain manek akena. Iir nain Yeesus iimarep kerewa kiriremi maek, “Mua eena kema enekariya nain yo efar ekapep eka eniminok. <sup>38</sup>Ne mua eena yo opora efar miimiya nain eka anane kema-pa wiar imenarem-ikainon, eka arona-pa imenarem-ikaiya naap, eena Mua Maneka opora maek naap.” <sup>39</sup>Ewar Eliwa maemi eka maek. Mua eena o opora wiar opiya nain Ewar Eliwa aawinon. Nain iir nain eewuar, moram Yeesus unum maneka me aawowa ikua.

<sup>40</sup>Wi naap miimap papako-ke maemik, “Aa, mua fain profet makena-ke.” <sup>41</sup>Ne papako-ke maemik, “O Kraisi-ke.” Ne teeria oko-ke maemik, “Kraisi eliw Galili kame-pa imenarinon-i? Weetak. <sup>42</sup>Moram Mua Maneka opora feenap maek, Kraisi ikoka Yuudia kame Betlehem owowa-pa imenarinon, Dewit kerekera-pa.” <sup>43</sup>Wi Yeesus muuta nain naap aakunemi wiam pukep erup aremik. <sup>44</sup>Ne papako opu naemik, nain mua kuisow-ko ekap me opak.

<sup>45</sup>Aria wi tempel ami mua oram kirep ikiwiwkin wi pris woos mua ne wi Farisi-ke wia nokaremik, “Ni moram me opap pekapeman?” <sup>46</sup>Ne wia maakemik, “O opora eena maiya nain mua kuisow naap-ko me maimik.” <sup>47</sup>Ne wi Farisi-ke wia maakemik, “Ne nis pun naap nia wadolalowak-i? Ae-na. <sup>48</sup>I woos mua ne i Farisi mua kuisow opora-ko wiar opimik-i? <sup>49</sup>Wi mua o opora wiar ookimik nain wi kema marew-ke, Moses sira me wiar amisaremik. Wi nain pina-pa ikemik, iiwawun maa anima mia-pa wiam wuap-puamik,” naap maemik. <sup>50</sup>Ne Farisi mua oko, unuma Nikodemus, mua nain iir oko Yeesus wiar ikiwok. <sup>51</sup>Os-ke wia maakek, “Nee, i sira naap-ko yiar ikua-i? Mua opora me wiar mekawowa, o pina onak naimik-i?” <sup>52</sup>Naeya wis-ke maakemik, “Aa, nos pun Galili mua-ke-yon aa? No Mua Maneka opora baliwep urufap amisarinan, profet Galili kame-pa me imenarinon,” naap maakemik.<sup>c</sup>

<sup>c</sup> 7.52 Opora fain (1-11) Yon ona me siisimok-yon. Wi amis mua-ke maimik, mua oko-ke siisimep fan mikowawamik.

### Yeesus emeria oko pina wiar iirarek

**8** <sup>1</sup>Aria mua unowa wiena koora ikiwiwkin Yeesus ona waisow Oliw ema urupok. <sup>2</sup>Nan ikok uuriw akena nainiw oromi tempel pika kemena ikiwok. Nan ikaeya mua unowa ekapep warikiwkin pokap ikok opora wia maakem-ikua. <sup>3</sup>Ne aria emeria oko soma mua ikos ikaiwkin urufap opamik. Opap wi Farisi ne wi sira amis mua wapena-pa wiar wuiwkin Yeesus wiar pikiwemik. Pikip mua unowa mokok epa-pa iimarowamik. <sup>4</sup>Iimarowap Yeesus maakemik, “Somek mua, emeria fain muewowa puukap soma mua wameiya ikaeya urufap opap fan amapekapemik. <sup>5</sup>I sira eena Moses yia wuomak nain feenap, wi soma oraimik nain nomon ika wiarimik. Ne no kamenap main?” <sup>6</sup>Wi o opora uferinok naep naap nokaremik. Kamenap maeya-na opora-pa wuiyen naemik. Ne Yeesus-na ineka kuep wapeniw miiwa-pa maa siisimem-ikua. <sup>7</sup>Ne wi yaawerow marew nokarem-ikaiwkin iimarep wia maakek, “Ni mua kuisow-ko pina naap me onap-na ookikir nomona wafurominok.” <sup>8</sup>Naap wia maakep-puap nainiw ineka kuep miiwa-pa maa siisimem-ikua. <sup>9</sup>Naeya wi mua teeria nain naap miimap mua kuisowiwiw ikiwem-ikemik. Wi iperowa kiikir miimiwkin wi papako muraremik. Ne emeria nain waisow nan iimarep ikua. <sup>10</sup>Aria Yeesus nainiw iikirap kiri-kirek-na emeria nain waisow ikua. Ne maakek, “Nee, wi teeria faa, kamenap aremik? Mua kuisow-ko feek ikok nefa ifakimowa me maek-i?” <sup>11</sup>Naeya emeria nain-ke maakek, “Maneka, weetak.” Ne Yeesus-ke maakek, “Ne yos pun naap me nefa oninen. No ikiwep pina nainiw me one,” naap maakek.

### Yeesus-na miiw parina-ke

<sup>12</sup>Ne aria Yeesus nainiw wia maakemi maek, “Yo miiwa fain parina-ke. Wi mua eena yo yookimik nain parina wiar ikaeya anane eliwa ikaikuan, wi epa kokoma-pa me soomarikuan.” <sup>13</sup>Naeya wi Farisi-ke maakemik, “No nena kema-pa opora naap name main. No nena name main nain nena naisow name main. Naapeya opora makena-ke me nefar naiyen.” <sup>14</sup>Ne wia maakek, “Aria, yo yena kema-pa opora yame mainen-na, nain pun makena-ke. Moram owowa eena yo ekapem nain amisarem, ne ikoka kirep ikiwowa pun amisarem. Ne ni me efar amisareman. <sup>15</sup>Ni anane miiw sira ookami mua wia mekawap opora-pa wia wuiman. Yo mua kuisow opora-pa-ko me wia wuiyem. <sup>16</sup>Nain opora-pa wia wuinen nainen-na yo eliw naap oninen. Moram me yo yaisow kema-pa aakuniyem, weetak. Auwa ona efa sesekak nain efamiya ikua. <sup>17</sup>Ne ni niena sira Moses wuak nain feenap siisimep-puiwkin maiman, opora kuisow nainiw mua wiam erup maiwkin makena-ke naiman. <sup>18</sup>Ne yos pun naap yena yame maiyem, ne o eena efa sesekak nain yena Auwa

nain pun yo efa maiya.” <sup>19</sup>Naeya wis-ke nokaremik, “Nena niawi kaanek ikua?” Ne wia maakek, “Ni me efa amisareman, naeya yo Auwa me efar amisareman. Yo efa amisarekaman-na Auwa pun efar amisarekaman.” <sup>20</sup>Tempel pika kemena eena maamuma wuimik nan opora wia maakem-ikua. Ne iir nain pun me opamik, moram o epa eewuar.

### Yeesus iinan owowa ikiwowa maek

<sup>21</sup>Ne aria nainiw wia maakek, “Yo fan ikiwiyem, ikiwemkun yo efa akupowen. Ne ni ikoka niena pina-pa umowen. Owowa eena yo ikiwiyem nain ni ikiwowa me pepeke.” <sup>22</sup>Naap maeya wi Yuuda-ke maemik, “Moram feenap maiya, ‘Owowa yo ikiwiyem nain ni ikiwowa me pepeke,’ naiya. Ona wame ifakimekam naep naap maiya-i?” <sup>23</sup>Ne wia maakek, “Yo owow iinan mua-ke, ne ni wia. Ni miiwa fain mua-ke, ne yo iinan-pa orom. <sup>24</sup>Neemi yo iiriw nia maakem naap, ni ikoka niena pina-pa umowen. Yo os-ke yame maem nain ni makena-ke me efa naowen-na niena pina-pa umowen.” <sup>25</sup>Naeya nokaremik, “No mua naareke?” Ne wia maakek, “Yo iiriw nia maakem, yo mua nain-ke. <sup>26</sup>Yo nia mekawami nia maakowa nain opora senam akena efar ikua. Ne o eena efa sesekak nain makena-ke. Opor unowa o wiar miimap miiw mua nia maakiyem.” <sup>27</sup>Ona Wiawi maemi naap wia maakem-ikua, nain wi kema-ko me aawemik. <sup>28</sup>Naapeya wia maakek, “Ni ikoka yo Mua Muuka efa fakerap efa amisarowen, yo os-ke. Ne yo yena kema-pa maa me oniyem, nain pun amisarowen. Auwa ona efa maakiya nain muutiw maiyem. <sup>29</sup>Ona efa sesekak nain-ke efamiya ikua. Efa piipueya yaisow me ikaiyem, weetak. Moram maa unowa ona kookaliya naap oniyem.” <sup>30</sup>Naap maeya wi unow akena opora makena wiar naemik.

### Abraham muuk unowa

<sup>31</sup>Aria wi o opora makena wiar naemik nain wia maakek, “Ni kekanep yo opora efar opam-ikowen-na yena teeria kakeniw-ke nia nainen. <sup>32</sup>Naeya ni opor makena amisarowen, ne opor makena nain-ke nia wasirkeya eliwa ikowen.” <sup>33</sup>Ne wis-ke maakemik, “I Abraham nembesir unowa-ke. I mua oko tepak-pa wiar ikok uuwow mua me ikemik. Ne no kamenap naep naap maen, ‘Ni ikoka nia wasirkiwkin eliwa ikowen.’ ” <sup>34</sup>Ne wia maakek, “Yo makena nia maakiyem. Mua eena sira samora oniya nain, mua nain sira samora-ke kaikap-pueya ikua, uuwow mua saarik. <sup>35</sup>Ne uuwow mua unum marewa ikaiya. Makena, Muuka-ke ona Wiawi kemena-pa anane unum onaiya ikaiya. <sup>36</sup>Ne os-ke nia wasirkep aawinon-na eliwa ikowen. Nain feenap, ni ikoka eliw akena ikowen. <sup>37</sup>Yo amisarem, Abraham niena nomokow fiira-ke. Nain yo opora nia maakiyem nain ni kema-pa me wuiman, miimowa miatinep yo efa ifakimu naep oniman. <sup>38</sup>Yo maa unowa yena Auwa wiar urufap nia maakiyem nain nis-ke niena niawi oko-ke nia maakeya naap oniman.”

<sup>39</sup>Naeya maakemik, “Abraham-na yiena auwa-ke naimik.” Ne wia maakek, “Ni Abraham muuka ikekaman-na sira wiar ookekaman. <sup>40</sup>Yo opor makena Mua Maneka wiar miimam nain nia maakekam naep oniyem-na nis-ke efa ifakimu naep oniman. Abraham iiriw sira naap-ko me onam-ikua. <sup>41</sup>Ni niena niawi oko ookap uuwowa naap wiar oniman.” Ne maakemik, “I me era muuka-ke. Yiena Auwa kuisow Mua Maneka nanek, ne i o muuka akena-ke ikemik.”

<sup>42</sup>Ne wia maakek, “Mua Maneka ni Niawi ikekak-na yo efa kookalekaman, moram yo o wameiya ikok orop aakisa fan ikem. Yo yenaiw me orom, weetak, ona efa sesekak. <sup>43</sup>Ne yo opora maiyem fain ni moram kema me pukeman? Nain feenap, yo efa miimowa miatiniman, naapeya kema me pukeman. <sup>44</sup>Ni niena niawi Satan muuk unowiya o kookalowa wiar ookiman. O mua wia samoram-ikua, iiriw ekera ekapep aakisa. Ne opor makena me opiya, moram opor makena nain o marew. Ona kema-pa opora kiripami nia peeskimem-ikua. Moram o mua wadola-ke, ne opor wadola onoma os. <sup>45</sup>Naapeya yo makena nia maakiyem, nain ni opora me efar opiman. <sup>46</sup>Ne ni mua kuisow yo pina onamkun-ko efa urufaman-i? Nain yo opor makena nia maakiyem nain ni moram me efar opiman? <sup>47</sup>Mua eena Mua Maneka teeria-pa wiar ikaiya nain Mua Maneka opora wiar miimiya. Nain ni Mua Maneka teeria-pa me wiar ikeman, naapeya opora me wiar miimiman.”

<sup>48</sup>Naap wia maakeya wi Yuuda-ke maakemik, “I maken akena maimik, no wi Samaria mua-ke, ne sawur-ke nefa anirawamik, ae-na.” <sup>49</sup>Ne wia maakek, “Weetak akena, yo naap wia. Yo yena Auwa unuma piriye, nain nis-ke unuma efa samoriman. <sup>50</sup>Yo me yena unuma yame piriye, weetak. Mua eena yia mekawiya nain-ke unuma efa piriya. <sup>51</sup>Yo makena nia maakiyem, mua eena yo opora efar opiya nain me uminon.”

<sup>52</sup>Naeya wi Yuuda-ke maakemik, “Aa, i aakisa nefa amisaremik, no sawur-ke nefa anirawamik. Moram Abraham iiriw umok ne wi profet pun iiriw umurumemik. Nain nos-ke naap main, mua eena no opora nefar opinon-na me uminon. <sup>53</sup>No yiena nembesir Abraham nomakep maneka arekam naep-i? O iiriw umok, ne wi profet pun umurumemik. Ne no mua kamenap-ke, naeya naap main?”

<sup>54</sup>Ne wia maakek, “Yo yenaiw unuma yame pirinen-na ikoka makena me arinon. Yena Auwa niena Mua Maneka naiman nain-ke yo unuma efa piriya. <sup>55</sup>Makena, ni o me amisareman, nain yos-ke amisarem. Ne yo me amisarem nainen-na, yos pun ni saarik mua wadola ikainen. Nain yo amisarep opora wiar opiyem. <sup>56</sup>Neemi niena nembesir Abraham yo orowa nain kema wuam-ikua. Ne yo oromkun efa urufap kemelak.”

<sup>57</sup>Naeya maakemik, “Sa, no mokoma kamin ikok no Abraham urufam nain?” <sup>58</sup>Ne wia maakek, “Yo makena nia maakiyem, yo iiriw iiriw ikem. Yo iiriw ikemkun Abraham imenarek.” <sup>59</sup>Naap maeya, nan-pariw nomon

ika waru naep onamik-na wia, yakeyak manekiya wia bilik aremi tempel piipup oromi ikiwok.

### Yeesus mua mokok opa saliwak

**9** <sup>1</sup>Aria Yeesus ikiwem-ikok mua mokok opa-ko urufak. Mua nain iiriw onak uroma-pa naap orok. <sup>2</sup>Aria Yeesus ona teeria-ke nokaremik, “Somek mua, mua fain naarew pina-pa onak-ke mokok opa naap muukarek? Mua nain ona pina-pa e onak wiawi pina-pa?” <sup>3</sup>Ne wia maakek, “Weetak, me mua nain ona pina-pa e onak wiawi pina-pa naap imenarek. Naap arep ikua nain, ikoka Mua Maneka-ke saliweya mua unowa o kekanowa wiar urufikuan. <sup>4</sup>Aakisa ama maneka ikua fainiw o eena efa sesekak nain uuwowa onomiyen. Epa nan kokomariya, uura mauwowa me pepek. <sup>5</sup>Yo fan ikem nain miw mua parina wiem-ikaiyem.”

<sup>6-7</sup>Naap maep-puap ineka kuemi opeka tuenep opeka nain miw onaiya kiripak. Kiripap aawep mua nain mokoka-pa ifomami maakek, “No ikiwep Siloam eka unawera-pa mokoka yasuwe.” Eka unuma nain kemena feenap, “Sesekowa”. Naeya ikiwep mokoka yasuweya mokoka wiar wilinek. Naeya kirep ekapok.

<sup>8</sup>Ne aria ona owow epaskun ne wi mua iiriw maamuma wia nomarem-ikua nain urufamik nain-ke naap urufap wi-wieniwi wiam nokaremik, “Nee, mua fain anane fan pokap ikok maa yia nomarem-ikaiya nain-ki?” <sup>9</sup>Ne papako-ke maemik, “Ae, mua nain-ke.” Ne papako-ke maemik, “Sa, weetak. Mua fain o saarik urufinan.” Naap aakunem-ikaiwkin ona wia miimap wia maakek, “Ae, yos-ke.” <sup>10</sup>Naeya nokaremik, “Ne no kamenap onap mokoka wilinep aakisa maa urufin?” <sup>11</sup>Ne wia maakek, “Mua Yeesus naimik nain-ke sipa aawep mokoka-pa ifomep efa maakek, ‘No ikiwep Siloam eka unawera-pa mokoka yasuwe.’ Naeya opora wiar ookap naap onamkun mokoka efar wilineya maa urufiyem.” <sup>12</sup>Ne nokaremik, “Mua nain ona kaanek ikua?” Ne os-ke, “Yo me amisarem,” naap wia maakek.

### Wi Farisi mua sariarek nain baliwep akena nokaremik

<sup>13-14</sup>Yeesus sipa kiripap mua mokok opa saliwak nain, Sabat fofa-pa nain onak. Muut nain mua nain aawep wi Farisi wiar ikiwemik. <sup>15</sup>Ne wi Farisi-ke nokaremik, “O kamenap onap mokoka nefar saliwak?” Ne wia maakek, “Sipa aawep mokoka-pa wuomep-puap ikip mokoka yasuwowa efa maakeya naap onap aakisa maa urufiyem.” <sup>16</sup>Ne wi Farisi papako-ke maemik, “Mua sira naap onak nain me Mua Maneka wiar ekapok, naeya Sabat sira me ookiya.” Ne papako-ke maemik, “Weetak, pina mua maa miililina naap nain me oninon.” Naap maemi wiam fookamik. <sup>17</sup>Naap ikok nainiw mua mokok opa nain nokaremik, “Mua nefa saliwak nain no kamenap mainan?” Ne maek, “O profet-ke.”

<sup>18</sup>Ne o mokok opa ikok sariarek nain wi Yuuda makena-ke me naep ona onak wiawi wiar farep <sup>19</sup>wia nokaremik, “Ni maeka, mua fain ni muuka-ki? Ne mokok opa naap imenarek, naap-i? Ne kamenap onap aakisa maa urufiya?” <sup>20</sup>Ne onak wiawi-ke wia maakemik, “Ae, makena i muuka-ke, mokok opa naap imenarek. <sup>21</sup>Ne aakisa mokoka kamenap onap sariarep maa urufiya nain i me amisaremik. Ne mua naareke saliwak nain pun me amisaremik. O me gia muuta-ke, ona nokariwkin nia maakinok!” <sup>22-23</sup>Aria wi Yuuda woos mua iiriw opora feenap anumap-puamik, mua naareke Yeesus Mesaiya-ke nainon-na mua nain iiwawun iirarep sisina-pa wuiwkin wi wiamiya lotu me arinon. Wiam erup nain wia keker opap maemik, “O arimok aa, ona nokareka.”

<sup>24</sup>Ne kiiriw mua nain fariwkin ekapeya maakemik, “No Mua Maneka unuma-pa makena mae! I mua nain amisaremik, pina mua-ke.” <sup>25</sup>Ne os-ke wia maakek, “O pina mua-ki e wia, yo me amisarem. Yo maa kuisow fain amisarem, yo iiriw mokok opa ikem, ne aakisa maa urufiyem.” <sup>26</sup>Naeya nokaremik, “O maa mauwa nefa onak? Ne sira kamenap onap mokoka nefar saliwak?” <sup>27</sup>Ne wia maakek, “Yo nan maem, nain yo me efa miimaman. Ne moram nainiw mae-maep nainen? Nis pun o teeria wiar aru naep-i?” <sup>28</sup>Naeya wis-ke riirinemi maakemik, “No nena mua nain teeria-ke. I wia, i Moses sira wiar ookimik. <sup>29</sup>I fain amisaremik, Mua Maneka ona opora iiriw Moses iwok. Ne mua nain me amisaremik, ne epa kaanek ekapok nain pun me amisaremik.” <sup>30</sup>Ne mua nain-ke wia maakek, “Aa, ni opora naap maiman, naapeya yo kema suuwiyem-na weetak. Moram nis-ke o epa ekapok nain me amisareman naiman. Nain yo mokoka efar saliwak! <sup>31</sup>I feenap amisaremik, wi pina mua, Mua Maneka maa nokarimik nain opora me wiar miimiya. Makena, wi mua eena opora wiar miimap ookimik nain opora wiar miimiya. <sup>32</sup>Iiriw iiriw mua kuisow mua mokok opa-ko mokoka wiar saliwak naiwkin-ko me miimamik. <sup>33</sup>Ne mua fain me Mua Maneka wiar ekapekak-na maa miililina kuisow me onekak.” <sup>34</sup>Naeya wis-ke maakemik, “No pina onaiya ikok imenaren. Ne nos-ke i suule yiekam naep-i?” Naap kakankami iiwawun iiraremik.

### **Wi mua opora me opimik nain wi mokok opa saarik**

<sup>35</sup>Aria mua nain iiraremik nain Yeesus opora miimak. Ne mua nain akupap imenap maakek, “No Mua Muuka makena-ke nain-i?” <sup>36</sup>Naeya os-ke, “Oo Maneka, mua nain naarew main? Unufeya makena nainen.” <sup>37</sup>Ne Yeesus-ke maakek, “No mua nain aakisa urufin. Nain-ke nefamiya aakunem-ikaiya.” <sup>38</sup>Naeya maakek, “Maneka, aakisa yo makena naiyem.” Neemi Yeesus meren onoma-pa keema muuna mikap unuma fakerak. <sup>39</sup>Naeya maakek, “Yo miiwa fan ekapem nain yo muuta nain wia mekawikuan. Naapeya wi mua mokok opa eliw maa urufikuan, ne

mua mokok eliwa mokok opa arikuan.”<sup>40</sup> Aria wi Farisi papako pun nan ikaiwkin Yeesus opora naap maek. Naeya nokaremik, “Ne is pun mokok opa-ke yia nain-i?”<sup>41</sup> Ne wia maakek, “Ni mokok opa ikekamana ni pina marew ikekaman. Nain ni feenap maiman, ‘I maa urufimik,’ naapeya ni pina naap niar ikainon.”

### Sipsip nepiow mua eliwa

**10**<sup>1</sup> “Aria yo makena nia maakiyem, mua eena sipsip pika omopora-pa kemena me ikiwowa, pika ara-pa pikinep kemena oriya nain ikum mua-ke, ne mua samora-ke.<sup>2</sup> Ne mua anane omopora-pa kemena ikiwiya nain o sipsip nepiow mua makena-ke.<sup>3</sup> Omopora urufiya mua nain-ke omopora teekeya kemena ikiwiya. Ikiwep ona sipsip iiwawun maneka unuma wia unufami wia aankeya iwakara wiar miimap ekapiwkin owaruma wia poraiya.<sup>4</sup> Owaruma wia porop ona miimeya murarep ookimik, moram o iwakara wiar miimap amisaremik.<sup>5</sup> Mua oko me wiokikuan, weetak, iwakara sira oko miimap baurarikuan.”<sup>6</sup> Yeesus arekin opora fain wia iromak, nain wi kemena me wiar aawemik.

<sup>7</sup> Naapeya feenap maek, “Yo makena nia maakiyem, yo sipsip pika omopora-ke.<sup>8</sup> Wi mua papako iiriw ekapemik nain wi ikum mua ne mua samora-ke. Naeya wi sipsip opora me wiar miimamik.<sup>9</sup> Yo omopora-ke, mua yo efar ekapemi kemena ikiwiya nain eliwa ikainon. Maa enowa akupami eliw orop nainiw urupep iwinon.<sup>10</sup> Wi ikum mua-na maa ikum aawu naep, wia ifakimu naep ne maa samoru naep ekapimik. Ne yos-ke pokow eliwa aawuk naep ekapem, ne pokow eliwa nain naap wiar manekarem-ikainon.

<sup>11</sup> Aria yo sipsip nepiow mua eliwa-ke. Sipsip nepiow mua eliwa-na ona sipsip teeria wia asipami eliw uminon.<sup>12</sup> Ne uuwow mua wia sesenariwkin sipsip wia urufomimik nain wia. Naeya siow asia-ke ekapeya urufap sipsip neeke wia piipuap baurarikuan. Ne siow asia-ke sipsip nain wia fa-faemi papako wia ifakiminon.<sup>13</sup> Moram o oram uuwow mua-ke, sipsip me wia kema suuwinon.<sup>14-15</sup> Ne yo sipsip nepiow mua eliwa-ke. Yo yena sipsip baliwep wia amisarem, ne wis pun yo efa amisaremik. Sira naap akena, Auwa ona yo efa amisarek, ne yo o amisarem. Ne yo yena sipsip teeria muuta nain eliw uminen.<sup>16</sup> Aria yo sipsip teeria papako pun efar ikemik. Wi nain pun wia aawep yena pika kemena-pa wia wuamkun teeria kuisow arep opora efar miimam-ikaikuan. Naeya sipsip teeria kuisow ne nepiow mua pun kuisow, naap ikainon.

<sup>17</sup> Yena Auwa manek akena efa kookaliya, moram yo umep iikirowa nain eliw naem.<sup>18</sup> Wi mua efa ifakimikuan nain, me wieniw efa ifakimikuan, weetak. Yo yena yame wuami uminen naemkun eliw efa ifakimikuan. Yo eliw uminen, ne yena kekanowa-pa iikirinen. Auwa ona naap one naep kekanowa yiek.” Naap wia maakek.



<sup>19</sup>Aria wi Yuuda Yeesus opora maek nain muuta nainiw wiam fookamik. <sup>20</sup>Ne mua unowa-ke maemik, “O sawur-ke anirawiwkin ikiwosa momorarek. Ni moram opora wiar miimiman?” <sup>21</sup>Ne papako-ke maemik, “Weetak, mua eena sawur-ke wia anirawimik nain opora naap me aakunimik! Ne pun mua mokok opa kamenap saliwikuan?”

### Wi Yuuda-ke Yeesus iiraremik

<sup>22</sup>Aria Yerusalem owowa-pa lotu onowa fofa maneka kererek, iiriw tempel omopora paaskamik fofa nain. Fofa nain anane dabel saana-pa kereriya. <sup>23</sup>Iir nain Yeesus tempel pika kema-pa soomarem-ikua, epa nain Solomon soomarow epa naimik. <sup>24</sup>Ne wi Yuuda-ke ekapep o warikap ikok nokaremik, “No iikamin opor makena yia maakinan? No Mesaiya-na makena mae.”

<sup>25</sup>Ne wia maakek, “Yo iiriw nia maakem nain ni makena me efa naeman. Uuwow unowa yena Auwa unuma-pa onami ariman yame wuiyem. <sup>26</sup>Nain ni me yo sipsip teeriaiya opora me efar opiman. <sup>27</sup>Yo yena sipsip anane iwakara efar miimimik. Yo wia paayarem, ne wi yo yookimik. <sup>28</sup>Yo wia aawemkun anane eliwa ikaikuan, me mesenalikuan. Yo baliwep wia opap ikem ne mua oko-ke yo wapena-pa efar wasirkap aawowa me pepek. <sup>29</sup>Yena Auwa eena yo wapena-pa wia wuak nain kekanowa akena-ke, maa unowa os-ke nomakek. Naeya wi mua yena Auwa wapena-pa wiar ikemik nain wia mufep aawowa me pepek. <sup>30</sup>I Auwa ikos epaskun akena ikemik.”

<sup>31</sup>Naap maeya nomon ika waru naep onamik. <sup>32</sup>Ne wia maakek, “Yo uuwow eliwa unowa yena Auwa wiar aawep onamkun urufaman nain, ni kain kema suuwap nomon ika enaru naep oniman?” <sup>33</sup>Naeya maakemik, “I me nain naep nefa ifakimu naep onimik. Nos-na no mua oram nain-ke Mua Maneka firekap main, yo Mua Maneka-ke name main.”

<sup>34</sup>Ne wia maakek, “Mua Maneka opora iiriw siisimep-puamik nain amisareman, feenap, Mua Maneka-ke maek, ‘Ni unowiya mua maneka-ke’ naap maek. <sup>35</sup>Wi mua eena o opora wiar aawemik nain mua maneka-ke wia naek. Aria Mua Maneka opora nain eka me arinon. <sup>36</sup>Ne yo Auwa-ke efa nanikap efa sesekeya miiwa fan orom. Neemi yo Mua Maneka Muuka-ke yame naiyem nain me pepek-i? Ni moram efa maiman, ‘O Mua Maneka firekiya’. <sup>37</sup>Yo Auwa uuwowa me onominen-na makena, ni opora me efar opaka. <sup>38</sup>Aria ni eena yo opora me efar opiman nain yo maa miililina oniyem nain efar urufap-na makena-ke naeka. Neeke ni amisarowen, Auwa yo efamiya ikua ne yo o wameiya ikem.”

<sup>39</sup>Naap maeya wi nainiw opu naep onamik-na wia bilik aremi orok. <sup>40</sup>Ikiwep Yodan eka pona okaiwi ekap nan ikua, iiriw eena Yon mua wia yasuwam-ikua nan. <sup>41</sup>Nan ikaeya mua unowa o wiar ekapemik. Ekapemi maemik, “Makena, Yon iiriw maa miililina-ko me onam-ikua. Nain mua

fain maemi aakunem-ikua nain-ke maken akena.”<sup>42</sup> Ne iir nain mua unowa o opora wiar opamik.

### Lasarus umok nain Yeesus-ke iikirowak

**11** <sup>1</sup>Aria Betani owow mua oko Lasarus naimik nain napum maneka aawok. Ona wekera erup, Maria Mata ikos wis pun nan wameiya ikemik. <sup>2</sup>(Iir oko Maria nain-ke sanda aawep ekap Yeesus merena yasuwomap ona affi fuuliw meren supuka ipiwominon. Emeria nain womokowa Lasarus, os-ke napumarek.) <sup>3</sup>Ne wekera erup nain-ke Yeesus opora sesekomami maakemik, “Oo Maneka, nena nomar eliya napum maneka aawok.” <sup>4</sup>Ne Yeesus opor amisa nain aawep maek, “Napuma aawok nain me umowa-ke, weetak. Nain eena Mua Maneka kekanowa ne unum maneka wiar urufowa-ke. Ne Mua Maneka Muuka pun unum maneka aawinon.” <sup>5</sup>Wiam arow nain Yeesus manek akena wia kookaliya. <sup>6</sup>Nain opora miimap ewur me ikiwok, fofa erup nan ikua. <sup>7</sup>Ne nain weesereya arowona ona teeria wia maakek, “Arika, i kirep Yuudia ikiwikua.” <sup>8</sup>Naeya ona teeria-ke maakemik, “Sa, somek mua, erekema fan kame nan wi Yuuda-ke nomon ika nenaru naep onamik, nain no aakisa kiiriw ikiwowa main-i?” <sup>9</sup>Ne wia maakek, “I parina-pa ikemik. Epa wiimiya nain ewur akena me kokomariya, ae-na? Mua amirika soomariya nain merena maa me eewawinon. Moram amirikiya maa urufap soomariya. <sup>10</sup>Makena, uura soomaremi merena maera-pa arinon. Moram epa kokomiya maa urufowa me pepek.” <sup>11</sup>Ne wia maakek, “Yiena emar Lasarus napumarep inep ikua, yo ikiwep ifimekam naep.” <sup>12</sup>Naeya ona teeria-ke maakemik, “Sa, o ininon-na ikoka sariarinon.” <sup>13</sup>Lasarus umok nain Yeesus-ke o inep ikua naek. Naeya ona teeria kema maemik, inep ikaiya maiya. <sup>14</sup>Ne aakisa fan opor makena fookap wia maakek, “Lasarus iiriw umeya soopamik. <sup>15</sup>Yo eliw akena wameiya me ikem, moram yo maa onamkun ni ikoka urufap makena efa naeka naep. Arika, aakisa wiar ikiwikua.” <sup>16</sup>Naeya Tomas-ke Yeesus teeria papako nain wia maakek, “Arika, i yiena somek mua ookap ikiwikua. Unowiya eliw neek umiyen!” (Tomas unum oko Didimus<sup>d</sup> naemik.)

### Umep iikirowa onoma Yeesus

<sup>17</sup>Aria Yeesus ame ikiwep Betani fuunep naap miimamik, Lasarus iiriw umok, ne nomon ona-pa wuap-puiwkin fofa erepam ikiwok. <sup>18</sup>Betani owowa Yerusalem mamaiya-pa ikua. <sup>19</sup>Naapeya Maria Mata ikos wiena womokowa-ke umeya wi Yuuda unowa wia waawarowa ikiwemik.

<sup>20</sup>Aria Yeesus ekapem-ikaeya Mata maakiwkin miimap miira puuk-ikiwok. Ne Maria koorapa ikua. <sup>21</sup>O ikip era-pa mirowap maakek,

<sup>d</sup> 11.16 Unuma Didimus kemena feenap, onak-ke erup wia muukarek.

“Aa Maneka, no feek ikekan-na yo yomokowa me efar umekak. <sup>22</sup>Nain yo amisarem, no maa mauwa naep Mua Maneka nokarinan-na eliw nefa apekarinon.” <sup>23</sup>Naeya maakek, “Nena nomokowa ikoka iikirinon.” <sup>24</sup>Ne Mata-ke maakek, “Aa yo amisarem, ikoka miiwa weeserow epa-pa iikirinon.” <sup>25</sup>Ne Yeesus-ke maakek, “Umep kiiriw iikirowa, ne anane eliwa ikowa nain onoma yos, ne mua naareke yo opora efar opinon-na makena o uminon, nain iikirap eliwa ikainon. <sup>26</sup>Ne mua mokok enuma ikok yo opora efar opiya nain iiwawun me mesenalinon, weetak. Anane eliwa ikainon. Yo maem fain no makena efar nain-i?” <sup>27</sup>Naeya maakek, “Ae, Maneka, yo makena nefa naiyem. No Mesaiya-ke ne pun no Mua Maneka Muuka-ke. Mua eena miiwa orowa maemik nain, makena nos.”

### Yeesus omok

<sup>28</sup>Aria Mata naap maep weesereya nainiw kirep owowa ekapep ona wiamun Maria fareya epeya ifan onoma-pa maakek, “Somek mua fanek, no nefa ikumiya.” <sup>29</sup>Maria naap miimap ewursow akena Yeesus urufowa ikiwok. <sup>30</sup>(Yeesus owowa me wiar fuunowa ikua, iiriw Mata ikos era-pa aakunemik epa nan-pariw ikua.) <sup>31</sup>Ne wi Yuuda koorapa taanep ikemik nain Maria naap urufap matmat-pa omomekam naep ikiwiya naemi ookamik. <sup>32</sup>Aria ikiwep Yeesus urufap meren onoma-pa iima ifemakep ikok maakek, “Oo Maneka, no feek ikekan-na yo yomokowa me efar umekak.” <sup>33-34</sup>Naap maakemi omok, ne wi Yuuda ookap ekapemik nain pun omemik. Yeesus naap wia urufap kema beelalep kema-pa omem-ikok wia maakek, “O sapuka kaanek wuaman?” Ne wis-ke maakemik, “Maneka, i ikip nefa ofakowiyen.” <sup>35</sup>Naap maakiwkin Yeesus omok. <sup>36</sup>Ne wi Yuuda-ke maemik, “Aa, mua nain manek akena kookalek.” <sup>37</sup>Ne papako-ke maemik, “O mua mokok opa wia saliwam-ikua. Ne moram mua fain me saliwak, naeya me umekak!”

### Yeesus Lasarus iikirowak

<sup>38</sup>Aria Yeesus matmat ekam-ikok kema iiwawun beelalek. Matmat nain nomon ona-pa onamik. Sawi napuma nan wia wuap nomon opaimikiw ofomamik. <sup>39</sup>Ne ekap wia maakek, “Nomon opaimika nain iirareka.” Naeya Mata-ke maakek, “Oo Maneka, fofa erepam ikiwok, oko beel ikina yia aawinon!” <sup>40</sup>Ne Yeesus-ke maakek, “Yo iiriw nefa maakem, feenap maem, no makena efa naeya-na Mua Maneka kekanowa aakisa wiar urufinan. No iiriw me miiman-i?” <sup>41</sup>Naeya nomon maneka eena ona ofomap-puamik nain iiraremik. Ne Yeesus iinan mokakemi maek, “Oo Auwa, no opora efar miimin, naapeya sira eliwa naiyem. <sup>42</sup>Yo amisarem, no anane efa miimin. Nain yo mua unowa aakisa fan taanep ikemik fain wia naep maiyem. Naeya wi urufap no efa sesekan nain makena-ke efa nauk.” <sup>43</sup>Naap maep Lasarus farep maek, “Oo Lasarus, no iikirap epa

maneka ore!” <sup>44</sup>Naeya o eena iiriw umok nain iikirap orok. Miikapura, wapena, merena, mia ara iiwawun konimiw wasiep wuamik nain naap ikaeya feekiya orok. Oraeya wia maakek, “Konima wiar wasirkiwkin soomarinok.”

**Wi woos mua-ke Yeesus ifakimu naep opora anumamik**

*(Matiu 26.1-5, Mak 14.1-2, Luk 22.1-2)*

<sup>45</sup>Aria wi Yuuda unowa Maria waawarowa ekapep ikemik nain Yeesus naap oneya urufap papako-ke makena-ke naep opora wiar opamik.

<sup>46</sup>Ne papako-ke ikiwep Yeesus sira kamenap onak nain wi Farisi wia maakemik.

<sup>47</sup>Wia maakiwkin wi Farisi, wi pris woos mua wiam aawep ikip wi Kaunsel Maneka wiamiya fiirimemik. Aakunemi maemik, “Emawik noma, i sira kamenap oniyen? Mua nain-ke maa miililina kerew akena imeniya noma! <sup>48</sup>I naap mokokiwi urufam-ikaiyen-na mua unowa o ookiwiwkin wi Rom anim onoma-ke ekapep tempel kooro yiar samo-samorami yiena pun yia samorikuan!” <sup>49</sup>Ne mua oko unuma Kaiafas, o iir nain wi pris woos mua-pa ikua. Os-ke maek, “Ni maa kema suuwap me aakuniman. <sup>50</sup>I teeria maneka fain wi Rom-ke me yia samoruk. Naapeya mua kuisow-ke epa yiar aawep uminok. Naap nain eliwa.” <sup>51</sup>Opora maek nain me ona kema-pa maek, weetak. Iir nain pris woos mua-pa ikok maa ikoka imenarowa nain maek. Feenap, Yeesus-ke wi Yuuda unowiya epa wiar aawep uminon. <sup>52</sup>Ne me wi Yuuda muutiwi epa wiar aawep uminon, wi Mua Maneka muuka wiipa teeria unowa miiw maneka owowa unowa-pa ikemik nain unowiya wia aaweya teeria maneka kuisow ikaikuan.

<sup>53</sup>Aria iir nain naap urufap wi Yeesus ifakimowa naep era akupam-ikemik. <sup>54</sup>Ne naapeya Yeesus Yuudia kame-pa ariman me soomarem-ikua. Ona teeria wia aawep kame nain piipup ikiwep owowa oko Efraim naimik nan ikemik. Owowa nain epa asia nomon manekiwi nain mamaiya-pa ikua.

<sup>55</sup>Aria wi Yuuda Pasowa fofa mamaiyarek. Naapeya wi owow unowa Yerusalem ikiwemik. Neek ikok yiena mia tumina iirarep ikemkun fofa maneka nain kererinok naemik. <sup>56</sup>Wi Yeesus akupami tempel pika kemena-pa ikumami maemik, “Nee, Pasowa maapora fain me yiar ekapinon-i e kamenap?” <sup>57</sup>Wi Farisi ne wi pris woos mua-ke opor kekanowa ariman maemik, “Mua naareke Yeesus urufap-na ariman yia maakiwkin ikiwep opiyen,” naap maemik.

**Maria sanda aawep Yeesus merena ifomak**

*(Matiu 26.6-13, Mak 14.3-9)*

**12** <sup>1</sup>Aria Pasowa maapora fofa ikur okaiwi-pa kuisow ikaeya Yeesus Betani ikiwok. Betani-na Lasarus owowa-ke, eena umeya

Yeesus-ke iikirowak, mua nain owowa. <sup>2</sup>Owowa nan Yeesus maa enowa onomamik, ne Mata pun wia asipam-ikua. Ne Lasarus pun nan ikua. Wi unowiya kame kiir inep ikok maa enem-ikemik. <sup>3</sup>Naap ikaiwkin Maria sanda aawep feekiya ekapok. Sanda nain sesa manek akena. Ekapep sanda nainiw Yeesus merena sawikomap ona afif fuuliw sanda supuka ipiwomak. Ne koor kemena nain sanda ikina nain-keriw arek. <sup>4</sup>Ne ona teeria mua oko unuma Yuudas Iskariot, ikoka os-ke Yeesus wi iiwua wapena-pa wiar wuinon. Os-ke maek, <sup>5</sup>“Nee, sanda naap nain sesekekamik ya, naeya maamuma nain aawep wi mua oorpowa wia asipekamik,” naap maek. Maamuma nain maneka, mokoma kuisow uuwimik sesa naap. <sup>6</sup>Naap maek nain me wi maa marewa nain wia naep naap maek, weetak. Moram o ikum muaiya naap maek. Yeesus teeria unowa nain maamuma os-ke urufiya, ne iir kui-kuisow maamuma nain ikum wiar aawem-ikua. <sup>7</sup>Ne Yeesus-ke maek, “Neek sira efa oninok. Naap onap ikaeya ikoka yo efa soopowa epa kererion. <sup>8</sup>Wi mua oorpowa anane niamiya ikaimik. Ne yo anane niamiya me ikainen.”

<sup>9</sup>Aria Yeesus Betani-pa ikaeya wi Yuuda teeria maneka naap miimap ookap ikiwemik. Me o urufowa muutiw, weetak. Lasarus eena umep ikaeya iikirowak nain pun urufowa ikiwemik. <sup>10</sup>Naapeya wi pris woos mua Lasarus pun ifakimowa maemik. <sup>11</sup>Moram Lasarus iikireya wi Yuuda unowa o muuta nain Yeesus makena-ke naemi o ona-pa arem-ikemik.

### Yeesus Yerusalem urupok

*(Matiu 21.1-11, Mak 11.1-11, Luk 19.28-40)*

<sup>12</sup>Ne iir nain wi Pasowa maapora onowa naep emeria mua Yerusalem ekapep taanep ikemik. Uurik ona wi miimamik, Yeesus fan ekapiya naemik. <sup>13</sup>Naemi nomokow mekira wu-wuepap opap feekiya miira puuk-iwamik. Iwam-ikok urufap faremi maem-ikemik,

“Oo Mua Maneka iinan akena! Maneka, mua eena no unuma-pa ekapiya nain kekanowa iwe! O i Isrel Saria Maneka-ke.”

<sup>14</sup>Aria Yeesus donki iimarow eremina pekapomiwkin iinan-pa pokap Yerusalem urupok. Mua Maneka opora maek kakeniw naap. <sup>15</sup>Feenap,

“Ni Saiyon,<sup>e</sup> ni maa muutitik me keker opaka! Moram niena saria maneka donki iimarow eremina iinan-pa pokap ekapem-ikaiya, ni nain urufeka.” *(Sekaraiya 9.9)*

<sup>16</sup>Ne iir nain ona teeria opora nain kemena-ko me aawemik. Ne aakisa fan Yeesus parin maneka onaiya ikok unum maneka aaweya opora eena Mua Maneka opora-pa ikua nain kema suuwamik. Ne Yeesus sira naap onamik nain pun kema farerep maemik, makena.

---

<sup>e</sup> 12.15 Yerusalem unuma oko Saiyon naimik.

<sup>17</sup>Aria wi mua Yeesus iiriw Lasarus fareya iikirak nain urufap aakisa mua unowa wia maakiwkin meta manekarek. <sup>18</sup>Naapeya mua unowa oram me ikiwemik, weetak, Yeesus maa miililina onak nain miimap o urufowa ikiwemik. <sup>19</sup>Naap oniwkin wi Farisi-ke wi-wieniw wiam maakemik, “Sa, urufeka, i iiriw sira-ko onekamik-na eliw! I naap wia urufam-ikemkun emerija mua unowa iiwawun maneka o kame-pa arikimik!” Naap maemik.

### **Wi Grik papako Yeesus urufowa maemik**

<sup>20</sup>Aria Pasowa maapora-pa mua unowa lotu onowa naep Yerusalem urupemik. Ne wi Grik papako pun nain urupemik. <sup>21</sup>Wi nan ikok ikiwep Filip wiar kereremik. Filip-na Betsaida mua-ke, owowa nain Galili kame-pa ikua. Aria kererep urufap maakemik, “Oo saria, i Yeesus urufu naep.” <sup>22</sup>Ne os-ke ikip Andru maakep ikos ikiwep Yeesus maakemik. <sup>23</sup>Ne wia maakek, “Mua Muuka eena unum maneka ne kekanowa ariman wiar arowa nain epa aakisa fanek. <sup>24</sup>Yo makena nia maakiyem, maa makena miiwa-pa wafuriwkin naap ikok opa urupeya makena nain beelalinon. Ne naap me arinon-na ona oram akena ikainon, mokoka me pukinon. Aria maa makena nain-ke miiwa-pa orop opa urupemi makena nain mesenalalinon. Opa nain-ke arimemi makena unow akena wuinon. <sup>25</sup>Neemi maiyem, mua ona muutiw wame kema suuwiya nain samor aawinon. Ne mua eena miiw mua wiamiya ikok me wame kema suuwowa eliw samor aawinen naiya nain, ikoka anane maneka eliwa ikainon. <sup>26</sup>Ne o mua yo yookami mauwowa onam-ikomeya-na mua nain yo baliwep akena yookam-ikainok. Ne yo ikoka epa kaanek ikaiyem nain os pun efamiya ikainon, o eena yo uuwowa opomiya nain ikoka yena Auwa-ke unum maneka iwinon.”

### **Yeesus ona umowa wame maek**

<sup>27</sup>“Oo-ya, yo kema efar pinar-afuriya. Yo kamenap mainen? Oo Auwa, yo sirirowa aawowa fain efar iirare. Aa wia, moram yo muut nain ekapem. Ne aakisa epa nain fan efar imenariya. <sup>28</sup>Oo Auwa, nena unuma ne kekanowa maneka ariman name wue.” Naap maeya iwakara oko iinan-pa feenap maek, “Yo unum maneka iiriw ariman yame wuam, ne ikoka pun nainiw naap oninen.” <sup>29</sup>Naeya wi mua teeria maneka nan ikemik nain naap miimap maemik, “Nee, aapereka-ke paranek,” ne papako-ke maemik, “Sa, weetak, ensel-ke opora maakiya.” <sup>30</sup>Naap aakunem-ikaiwkin Yeesus-ke wia maakek, “Ni opora eena miimaman nain me yo efa naep maek, weetak. Ni nia naep naap maek, ni makena amisareka naep. <sup>31</sup>Aakisa miiw mua wia mekawowa epa fan kereriya. Ne miiw fain woos mua ikoka Mua Maneka-ke iiwawun iirarinon. <sup>32</sup>Ne yo ikoka efa fakeriwkin miiw mua unowa yena wia mufep purupemkun efamiya ikaikuan.” <sup>33</sup>Yeesus ikoka umowa nain wame maemi naap maek.

<sup>34</sup>Aria teeria maneka nain-ke maakemik, “Mua Maneka opora feenap maek, Kraiss anane ikainon. No moram feenap main, Mua Muuka ikoka fakeriwkin uminon. Mua Muuka nain naarew main?” <sup>35</sup>Ne wia maakek, “Ni parina epa maala me niar ikainon. Naapeya aakisa parina naap niar ikua nain-pa soomareka, oko epa kokoma-ke nia wakesiminon. Mua epa kokoma-pa soomariya nain kaanek ikiwowa nain me amisarek. <sup>36</sup>Mua eena parina niiya nain makena-ke naeka. Naeya ni parin teeria-pa ikowen.” Opora nain wia maakep weesereya wi nainiw me efar ekapuk naep oram mesenalep ikiwok.

### **Wi Yuuda Yeesus opora me wiar ookamik**

<sup>37</sup>Yeesus mua unowa mokok epa-pa maa miililina onam-ikua, nain wi makena-ke me naem-ikemik. <sup>38</sup>Naapeya iiriw Mua Maneka profet Aisaiya maek nain makena wiar arek. Feenap,

“Maneka, i opora maemik nain mua kuisow-ko makena-ke yiar naek-i? Ne pun no kekanowa ariman-ko wueya nefar urufamik-i? Weetak.”  
(Aisaiya 53.1)

<sup>39</sup>Naapeya aakisa Yeesus opora maem-ikua nain makena-ke me wiar naemik. Moram Aisaiya opor oko pun feenap maek,

<sup>40</sup>“Mua Maneka-ke mokoka ne kema wiar iiwkeya wi maa me urufikuan ne o opora kema me wiar suuwikuan. Ne pun wia maek, ‘Wi yia saliwinok naep me efar ekapikuan,’ naap wia maek.”  
(Aisaiya 6.10)

<sup>41</sup>Aisaiya iiriw Yeesus kekanowa wiar amisarep o maemi naap maek.

<sup>42</sup>Ne iir nain wi Yuuda woos mua pun lawisiw unowa Yeesus opora makena-ke naep opora wiar opap ikemik. Nain wi Farisi wia keker opap ariman me maem-ikemik, oko wi sisina-pa yia wuiwkin wiamiya lotu me ariyen, naap maemik. <sup>43</sup>Moram wi feenap maemik, i miiwa fain ikowa unum onaiya ikaiyen naemik. Mua Maneka-ke ni mua eliwa-ke yia naowa nain me kema suuwamik.

### **Yeesus ona opora-ke ikoka mua wia mekawinon**

<sup>44</sup>Aria naap ikok Yeesus opora kerewa maek, “Wi mua yo opora efar opimik nain me yo yaisow opora efar opimik, weetak. Makena, o eena efa sesekak nain pun opora wiar opimik. <sup>45</sup>Ne wi mua yo efa urufap anane yo kemaiw ikaimik nain pun naap, aria o eena efa sesekak nain pun naap onimik. <sup>46</sup>Yo parina-ke, wi miiw mua parina wiowa ekapem. Ne wi mua yo opora makena efar naimik nain wi parina-pariw efar ikaikuan, epa kokoma-pa me ikaikuan.

<sup>47</sup>Wi mua eena yo opora efar miimap me opimik nain yos-ke me wia mekawinen, moram yo me nain ekapem, weetak. Wia asipami wia aawowa ekapem. <sup>48</sup>Ne wi mua yo efa miatinep opora me efar miimimik

nain ikoka opora eena yo maiyem nain-ke wia mekawinon, wiimar miiwa weeserow epa-pa. <sup>49</sup>Moram yo me yena kema-pa opora maiyem, weetak. Auwa ona efa sesekak nain-ke efa maakeya maiyem. <sup>50</sup>Yo amisarep maiyem, opora eena Auwa maiya nain-ke anane eliwa ikowa nain imeniya. Ne yo opora maiyem nain Auwa ona efa maakiya nain kakeniw naap maiyem.” Naap maek.

### Yeesus ona teeria merena wia yasuwomak

**13** <sup>1</sup>Aria Pasowa maapora fofa uurika naap nain kererion, ne aakisa feenap nain Yeesus kema-pa maek, yo miiwa piupuap Auwa wiar ikiwowa epa fan mamaiyarek naek. Naeya ona teeria senam akena wia kookaliya nain wia ofakowap-puami uminen naek.

<sup>2</sup>Urera Yeesus ona teeria wiamiya enowa naep wiam fiirimemik. Ne mua Yuudas-na Satan-ke iiriw kema iwep-puak, Yeesus opap wi iiwua wapena-pa wiar wuowa nain. O Saimon Iskariot muuka-ke.

<sup>3</sup>Aria Yeesus ona wame amisarek, maa iiwawun ona Wiawi-ke o wapena-pa wiar wuap-puak. Ne pun amisarek, Mua Maneka wiar ekapok ne ikoka nainiw o wiar ikiwinon. <sup>4</sup>Naapeya ona wame poromi taar teekow mua saarik arep iikirami ona mia suuwowa anian iirarep konima aawep urom ara-pa aek. <sup>5</sup>Aep-puap epira-pa eka sawikap ona teeria mua kuisowiw merena wiar yasuwap konimiw meren supuka wiar ipiw-ikiwok. <sup>6</sup>Naap oni-ikiwemi Saimon Pita wiar areya maakek, “Maneka, nos-ke yo merena yasuwominan-i? Weetak.” <sup>7</sup>Ne Yeesus-ke maakek, “Yo sira oniyem fain onoma me amisaren. Ikoka amisare.” <sup>8</sup>Naeya Pita-ke maakek, “Weetak akena, yo merena me yasuwome.” Naeya maakek, “No merena me yasuwominen-na yo efamiya me ikainan.” <sup>9</sup>Naap maakeya maakek, “Oo Maneka, naapeya-na merena muutiw me yasuwome, wapena ne woosa pun iiwawun!” <sup>10</sup>Ne maakek, “Mua iiriw yakiek nain merena muutiw yasuwonok. O tumina marew. Ni unowa tumina marew, nain mua kuisow muuta-ke weetak.” <sup>11</sup>Moram iiriw amisarek, mua eena o aawep wi iiwua wapena-pa wiar wuowa nain. Naapeya maek, “O mua kuisow weetak.”

<sup>12</sup>Aria merena wia yasuwomap-puap mia suuwowa nainiw wuap ona epa ekak. Ne wia nokarek, “Yo sira nia onam nain ni kema-ko aaweman-i? <sup>13</sup>Ni anane yo ‘somek mua’ ne ‘Maneka’ efa naiman nain makena. <sup>14</sup>Nain yo niena Maneka ne somek mua-ke aakisa yame porop merena nia yasuwomam. Ne nis pun niam porop niena teeria mua oko naap wia oneka. <sup>15</sup>Yo aakisa nia ofakowami onam, ni naap oneka. <sup>16</sup>Makena nia maakiyem, uuwow mua-ke ona saria nomakep os-ke maneka me ariya. E, mua ikip uwiya nain-ke mua eena o sesekak nain nomakep os-ke maneka me ariya, weetak. <sup>17</sup>Aria ni aakisa opor kemena amisareman, ne ni sira nain onowen-na Mua Maneka kemelowa niinon!



<sup>18</sup>Yo opora nia maakem nain me ni mua iiwawun unowiya nia maem. Makena, yo nia amisarep nia pepekimem, nain mua kuisow-ke Mua Maneka opor oko makena arowinon, feenap,

‘Yena yomar oko eena yo efamiya maa enek nain-ke yo efa samorinon.’ (Someka 41.9)

<sup>19</sup>Yo aakisa nia maakem nain ikoka imenarinon. Ne imenareya ni urufup efa maowen, yo anane ikaiyem nain-ke, naap efa naowen. <sup>20</sup>Yo makena nia maakiyem, yo mua eena wia sesekiyem nain mua naareke wia aawiya-na yos pun efa aawiya nainen. Ne mua eena yo efa aawiya nain o efa sesekak nain pun aawiya nainen.” Naap maek.

### **Ikoka Yuudas Yeesus wi iiwua wapena-pa wuinon**

(Matu 26.20-25, Mak 14.17-21, Luk 22.21-23)

<sup>21</sup>Aria Yeesus naap aakunep-puap kema iiwawun samorarep maek, “Yo makena nia maakiyem, ni teeria fain mua kuisow-ke ikoka wi iiwua wapena-pa efa wuinon.” <sup>22</sup>Naeya ona teeria-ke mua naarew maek naemi wi-wieniwi wiam mokakemik. <sup>23</sup>Ne Yeesus mua eena kookaliya nain wameiya-pa wiar ikua. <sup>24</sup>Ne Saimon Pita-ke naarew maiya naep mua nain maariw maakek. <sup>25</sup>Naeya mua nain-ke kame kiir inep ikok maara muutiw kirep Yeesus nokarek, “Maneka, no mua naarew main?” <sup>26</sup>Ne maakek, “Mua eena ikoka emer ikowa kakawa maa eka-pa suuwap onakinen. Mua nain-ke naap oninon.” Naap maemi emer ikowa kakawa aawep maa eka-pa suuwap Yuudas onakek. <sup>27</sup>Ne Yuudas emer ikowa nain aawep enek. Naeya Satan-ke woosa iiwawun wiar kekanowak. Ne Yeesus-ke maakek, “No maa onekam naep-na ewurarep-pue.” <sup>28</sup>Ne ona teeria mamaiya ikemik nain mua kuisow opora nain kemena-ko me aawemik. <sup>29</sup>Moram wiena maamuma Yuudas-ke urufiya, naapeya wi kema naap maemik, maa enowa-ko sesenarinok naep maakiya-i e maa-ko sesenarep wi mua oorpowa wiinok naep maakiya-yon. <sup>30</sup>Aria Yuudas emer ikowa nain wiar enep-puap iikirap owaruma oromi ikiwok. Ne epa pun iiriw kokomarek.

### **Sira enuma**

<sup>31</sup>Yuudas ikiweya Yeesus-ke wia maakek, “Aakisa epa fan ekapok, Mua Muuka unum maneka ariman wiar arowa. Ne Mua Maneka kekanowa ne unum maneka mia-pa wiar urufikuan. <sup>32</sup>O Mua Maneka kekanowa ne unum maneka ariman wiar wueya Mua Maneka pun ona Muuka unuma pirami ariman arowinon. Ikoka kuisow naap oninon. <sup>33</sup>Muuk unowa, yo ni niamiya senam me ikainen. Ni ikoka efa akupowen. Iiriw wi Yuuda wia maakem naap, aakisa nis pun nia maakiyem, epa yo ikiwiyem nain ni ikiwowa me pepe. <sup>34</sup>Naeya yo aakisa sira enuma nia maakiyem, sira feenap onam-ikeka, ni niam kookaleka, yo nia kookaliyem naap. Nis pun

naap niam kookaleka. <sup>35</sup>Ni niam kookaliman nain wi unowa nain naap nia urufap maikuan, ‘ona teeria-ke,’ naap nia maikuan.”

**Yeesus Pita maakek, “No ikoka efa sailinan”**  
(*Matiu 26.31-35, Mak 14.27-31, Luk 22.31-34*)

<sup>36</sup>Ne Saimon Pita-ke nokarek, “Maneka, no kaanek ikiwin?” Naeya maakek, “Epa yo ikiwiyem nain no aakisa me yookinan. Ikok wiimar yookap ekapinan.” <sup>37</sup>Ne Pita-ke maakek, “Maneka, no moram efa iirarin? Yo no muuta nain eliw uminen.” <sup>38</sup>Naeya maakek, “Nos-ke yo muuta nain eliw uminan-i? Weetak. Yo makena nefa maakiyem, ikok uura aara me farowa ikaeya no sailemi maem-ikainan, mua fain yo me amisarem. Naap sailowa arow arinan.” Naap maakek.

**Yeesus-na wi mua Auwa wiar ikiwowa era-ke**

**14** <sup>1</sup>Aria Yeesus wiamiya aakun-ikiwemi maek, “Ni kema me samorareka. Mua Maneka opora wiar opap yos pun opora efar opaka. <sup>2</sup>Naapeya nia maakiyem, yena Auwa kora kemen unowa wiar ikua. Naeya yo kiikir ikiwep epa nia saliwap-puominen. Auwa kora epa marew ikekak-na yo naap me nia maakekam. <sup>3</sup>Ne yo ikip epa nia saliwap-puomap nainiw ekapep nia aawemkun ikiwep yena ikaiyem neeke efamiya ikowen. <sup>4</sup>Ni aakisa yo ikiwiyem nain era nain amisareman.” <sup>5</sup>Naeya Tomas-ke maakek, “Maneka, no epa kaanek ikiwin nain i me nefar amisaremik. Ne era pun kamenap amisariyen?” <sup>6</sup>Ne Yeesus-ke maakek, “Era maem nain yos, opor makena ne anane eliwa ikowa nain pun onoma yo yaisow. Mua yo me efar ekapinon-na Auwa pun me wiar ikiwinon, weetak akena. <sup>7</sup>Ni yo efa amisarep-na Auwa pun amisarowen. Ne aakisa nia mainen, ni o amisareman, ne pun urufaman.” <sup>8</sup>Ne Filip-ke maakek, “Maneka, i fain muutiw nefa nokariyen, i Auwa-ko yia ofakoweya yiena mokok onaiya urufap eliw.” <sup>9</sup>Naeya maakek, “Filip, yo epa maala ni niamiya ikem nain me efa amisaren-i? Mua yo efa urufak nain feenap maiyem, Auwa pun urufak. Ne moram naap main, ‘I Auwa-ko yia ofakoweya urufiyen.’ <sup>10</sup>Yo Auwa wameiya ikem ne Auwa yo efamiya ikua. No nain makena-ke me nain-i? Opora eena yo nia maakiyem nain me yena kema-pa maiyem, yo uuwiyem nain Auwa-ke ona efamiya ikok uuwam-ikaiya. <sup>11</sup>Yo Auwa wameiya ikem ne Auwa-ke yo efamiya ikua. Yo naap maiyem nain makena-ke efa naeka. Aria naap me naep-na yo maa miililina oniyem nain urufap makena efa naeka. <sup>12</sup>Yo makena nia maakiyem, mua eena yo makena efa naiya nain, yo mauwowa sira oniyem nain os pun eliw oninon. Neemi mauwowa sira oniya nain yo maa oniyem nain efar nomakinon, moram yo Auwa wiar ikiwiyem. <sup>13</sup>Naeya yo unuma-pa maa mauwa nokarowen-na eliw nia onominen. Naap onami Auwa unuma wiar pirinen. <sup>14</sup>Ni maa mauwa yo unuma-pa nokarowen-na eliw nia onominen.”

### Yeesus Ewar Eliwa sesekowa maek

<sup>15</sup>“Aria ni yo efa kookalowen-na yo opora nia maakiyem nain ookowen. <sup>16-17</sup>Ne ikoka yena Auwa nia nokaromamkun Ewar Eliwa nia sesekomaya anane niamiya ikok os pun nia asipam-ikainon. Ewar nain maken akena-ke. Wi mua miiw maa kookalimik nain o me urufikuan ne me amisarikuan, naapeya me aawikuan. Nain o anane naap niamiya ikainon, naapeya ni eliwi amisarowen. <sup>18</sup>Niisow me nia wuinen, ikoka nainiw niar imenarinen. <sup>19</sup>Lawisiw akena miiw mua me efa urufikuan. Nain ni niisow eliw efa urufowen, moram yo anane ikaiyem nain-ke, ne nis pun naap ikowen. <sup>20</sup>Ne iir nain ni feenap efa amisarowen, yo yena Auwa wameiya ikem, naeya ni yo efamiya ikeman ne yo ni niamiya ikem. <sup>21</sup>Mua eena yo opora efar opap ookiya nain-ke yo efa kookaliya. Ne yena Auwa pun o kookaliya ne yos pun kookalemi yena yame ariman wuinen,” naap maek.

<sup>22</sup>Ne Yuudas oko me Yuudas Iskariot, os-ke nokarek, “Maneka, moram i muutiw yiar ariman arinan ne wi miiw mua unowa nain weetak?”

<sup>23</sup>Ne maakek, “Nain feenap, mua eena yo efa kookaliya nain opora efar miimap ookinon, ne yena Auwa pun mua nain kookalinon. I Auwa ikos anane o wameiya akena-pa wiar ikaiyen. <sup>24</sup>Ne mua eena yo me efa kookaliya nain yo opora pun me efar ookinon. Opora eena nia maakiyem nain me yena opora-ke, weetak. Auwa ona efa sesekak nain opora-ke.

<sup>25</sup>Opor unowa nain iiriw niamiya ikok nia maakem-ikem. <sup>26</sup>Ne ikoka Ewar Eliwa eena nia asipowa nain Auwa-ke yena unuma-pa nia sesekomonon. Maa unowa iiriw nia maakem-ikem nain os-ke kema niemi nia kemapaweya maa kema suuwam-ikowen.

<sup>27</sup>Aria yo yena kema eliwa niemkun kema sonom eliwa ikeka. Yo nia saliwamkun kema sonom manekiw ikowen, kema naap nain miiwa feeke imenowa me pepeke. Ni kema unu-unowa me wueka, ne me keker opaka. <sup>28</sup>Yo iiriw nia maakem, yo ikoka nia piipuap ikiwep ikok nainiw niar imenarinen. Ne yo Auwa wiar ikiwiyem nain, yo efa kookalekaman-na ni opora fain efar miimap kemelap eliw naekaman. Moram Auwa ona Maneka-ke, ne yo tepak-pa wiar ikaiyem. <sup>29</sup>Yo maa unowa fain me imenarowa ikaeya nia maakem, ikoka imenareya urufap makena-ke naeka naep. <sup>30</sup>Yo niamiya senam me aakuninen. Moram miiwa fain woos mua ekapowa epa wiar weeserek. Ona sira kamenap efa onowa nain me pepeke. <sup>31</sup>Nain wi miiw mua feenap amisaruk naep, yo Auwa manek akena kookaliyem, naapeya maa unowa ona efa maakek kakeniw naap eliw ookinon.” Naap maep-puap wia maakek, “Arika, iikirap ikiwikua.”

### Yeesus-na wain nomokowa akena-ke

**15** <sup>1</sup>“Makena, yo wain nomokowa akena-ke ne yena Auwa-ke wain piita nain urufiya. <sup>2</sup>Ekeka eena me makenariya nain os-ke efar

irawiya. Ne ekeka makenariya nain kerewa makenarinok naep ekeka eena mua mikomakek nain saliwami urukiya. <sup>3</sup>Nis pun yena opora eena nia maakem nain-ke naap nia saliwap-pueya ikeman. <sup>4</sup>Naapeya ni yena efamiya ikeka ne yo ni niamiya ikainen. Ekeka pia ara-pa mikap makenariya. Onaiw me makenarinon. Ne nis pun naap, yo me efamiya ikowen-na me makenarowen.

<sup>5</sup>Yo wain nomokowa pia ara-ke ne ni ekeka-ke. Ne mua eena yo efamiya ikainon-na, ne yo o wameiya ikainen-na, mua nain makena kerewa wuion. Ni yo efamiya me ikowen-na sira eliwa kuisow me onowen. <sup>6</sup>Ne mua eena yo efamiya me ikaiya nain nomokow ekeka saarik irawiwkin orop ififarion. Ne ekeka naap nain firimep kuumowa-ke. <sup>7</sup>Naeya ni yo efamiya ikok yo opora efar opam-ikowen-na maa mauwa kookalep efa nokariman nain eliw nia asipinen. <sup>8</sup>Ne ni nomokowa makenarem-ikowa saarik naap onam-ikowen-na yena teeria-pa efar ikeman nain ariman niam wuowen. Naeya yena Auwa unum maneka aawinon.

<sup>9</sup>Yo yena Auwa efa kookaliya sira naapiw yos pun nia kookaliyem. Yo nia kookaliyem nain naap akena kema suuwam-ikeka, me piipueka. <sup>10</sup>Ne yo opora yookowen-na yo nia kookaliyem nain me piipuowen. Yo yena Auwa opora wiar ookami o efa kookaliya nain me piipuiyem naap.

<sup>11</sup>Yena kemelowa nain nis pun niar ikainok, ne ni kemelow manekiw ikeka naep opora unowa fain iiriw nia maakomakem. <sup>12</sup>Ne opora efar ookowa nain feenap, nis pun niam kookalem-ikeka, yo nia kookaliyem naap. <sup>13</sup>Mua eena ona womar eliwa wia kookalowa sira unowa, nain sira manek akena feenap, ona womar epa wiar aawep os-ke uminon. Nain maa maneka-ke. <sup>14-15</sup>Ne ni yo opora efar miimowen-na yena yomar eliwa nia nainen. Uuwow mua-na ona saria-ke uuwowa muutiw maakiya, ona kema kamenap ikua nain me maakiya, naeya wiar amisarion. Ni aakisa yena uuwow mua me nia nainen, weetak. Yena yomar eliwa nia naep maa unowa yena Auwa efa maakek nain iiwawun nia maakomakem. <sup>16</sup>Nis-ke me efa pepekimeman, weetak. Yos-ke nia pepekimem, ni ikiwemi anane wain nomokowa saarik naap makenarem-ikeka naep. Ne makena nain anane naap niar ikainok. Naeya ni maa mauwa kookalep yo unuma-pa Auwa efar nokarowen-na eliw nia asipinon. <sup>17</sup>Yo sira kekanowa nainiw nia maakiyem, ni niam kookalem-ikeka.”

### **Wi miiw mua-ke Yeesus teeria wia iiwuarikuan**

<sup>18</sup>“Aria wi miiw mua-ke nia iiwuariwkin-na kema suuweka, yookikir naap efa iiwuaremik. <sup>19</sup>Ni miiw fain sira wiar ookekaman-na wi wiena wiam kookalimik naap nia kookalekamik. Nain ni me kakeniw miiwa fain mua-ke, weetak. Ni miiw sira-pa ikaiwkin yena nia nanikap aawem. Naeya nia iiwuarimik.

<sup>20</sup>Yo nia maakem nain kema suuweka. Feenap, uuwow mua-ke ona saria nomakep os-ke maneka me ariya, weetak. Naapeya wi yo efa samorimik, aria ikoka nis pun naap nia samorikuan. Ne yo opora efar miimikuan-na aria nis pun naap, opora niar miimikuan. <sup>21</sup>Wi yo muuta nain naap nia onam-ikaikuan. Moram o eena efa sesekek nain me amisaremik. <sup>22</sup>Yo ekapep opora me wia maakekam-na wi pina marew naekamik. Ne wi aakisa pina marew wiam naowa me pepep. <sup>23</sup>Ne mua eena yo efa iiwuaria nain Auwa pun efar iiwuaria. <sup>24</sup>Yo uuwowa oniyem nain mua kuisow-ko me oniya. Me onekam-na wi pina marew naekamik, ne aakisa weetak. Moram yo maa miililina onamkun efar urufamik, nain yena Auwa owawik yia iiwuarimik. <sup>25</sup>Wi sira naap onimik nain Mua Maneka opora iiriw ikua nain makena arowimik, feenap,

‘Onom marew maneka nain efa iiwuaremik.’ (Someka 35.19, 69.4)

<sup>26</sup>Yo ikoka Ewar Eliwa sesekamkun oromi ni niamiya ikok nia asipami nia ofakowam-ikainon. Auwa wameiya-pa ikaeya sesekamkun orop opor makena aakunemi yo efa maemi opora efar kekanowinon. <sup>27</sup>Ni iiriw yo uuwowa onoma wuam nain efamiya ikeman nain ekapep aakisa, naapeya nis pun yo efa maemi opora efar kekanowami naap uuwam-miawowen.”

**16** <sup>1-2</sup>“Aria ni me oro-booneka naep opora fain nia maakem. Ne ni fain amisareka, wiimar wi Yuuda wiamiya lotu arowa nain nia iiraremi sisina-pa nia wuikuan. Ne aakisa epa nan imenariya, ikoka nia ifakimep maikuan, i naap onami Mua Maneka uuwowa eliwa onomimik. <sup>3</sup>Wi Auwa me amisaremik, ne yos pun me efa amisaremik. Naeya sira naap onikuan. <sup>4</sup>Yo fain naep nia maakem, epa nain imenareya sira naap nia oniwkin aakisa fan nia maakem fain kema suuweka. Yo iiriw me nia maakem, moram yena niamiya ikem. Aakisa yo nia piipuekam naep opora fain ariman nia maakiyem.”

#### Ewar Eliwa uuwowa

<sup>5-6</sup>“Ne aakisa o eena efa sesekeya ekapem nain wiar ikiwiye. Nain yo opora nia maakem muuta nain ni kema damol maneka ikeman. Naapeya yo kaaneke ikiwiye nain ni mua kuisow-ko me efa nokariman. <sup>7</sup>Nain yo makena nia maakiyem. Ni nia naep maiyem, yo ikiwowa nain maa eliwa-ke. Moram yo me ikiwinen-na ni nia asipowa nain me niar ekapinon. Nain yo ikiwep yena nia sesekominen. <sup>8</sup>Ikoka os-ke ekapemi miiw mua kema suuwowa wadola nain ariman wiar wuinon. Sira feenap, wi pina-pa ikemik nain, ne wiena kekanowa-pa kakeniw ikaiyen naimik nain ne Mua Maneka mua wia mekawowa me pepep naimik, nain. <sup>9-10</sup>Wi pina ariman wiar wuinon nain feenap, yo opora makena-ke me efar naimik. Wiena kekanowa-pa kakeniw ikaiyen naimik nain ikoka ariman wiar wuowa nain onoma feenap, yo Auwa wiar ikiwinen, ne ni ikoka me efa urufam-

ikowen. <sup>11</sup>Ne Mua Maneka wia mekawowa pun ariman wuinion, moram miiw fain woos mua Mua Maneka-ke iiriw mekawak.

<sup>12</sup>Yo nia maakowa nain opora unow akena efar ikua, nain ni aakisa miimap kema-pa wuowa me pepeke. <sup>13</sup>Ne ikoka Ewar maken akena nain-ke oromi era makena-pa nia pikiweya opor makena amisarep ookowen. Ona kema-pa opora me imeninon, weetak. Opora eena Auwa wiar miimiya nain kakeniw nia maakinon. Ne maa wiimar imenarowa nain pun nia maakinon. <sup>14</sup>Yo opora pun efar aawep nia maakinon, naap onami yo unuma efa purupinon. <sup>15</sup>Auwa maa unowa nain pun yena efarik. Naapeya maem, ikoka Ewar Eliwa-ke opora efar aawep ni nia maakem-ikainon.”

### **Kema samora-ke kiremi kemelowa imeninon**

<sup>16</sup>“Ni lawisiw akena yo me efa urufowen, ne naap ikok nainiw efa urufowen,” naap maek. <sup>17</sup>Naeya ona teeria papako wi-wieniw aakunemik, “Nee, kamenap maemi naap maek, ‘Ni lawisiw akena me efa urufowen ne naap ikok nainiw efa urufowen.’ Ne pun feenap maek, ‘Yo Auwa wiar ikiwinen.’ <sup>18</sup>‘Lawisiw akena’ naek nain onoma kamenap? I kema me wiar aawimik.” <sup>19</sup>Naap maemi Yeesus nokaru naep onam-ikaiwkin ona amisarep wia maakek, “Ni yo eena maem nain aakunem-ikaiman-i? <sup>20</sup>Yo makena nia maakiyem, ni ikoka omem-ikaiwkin miiw mua unowa kemelikuan. Makena, ni kema damolalowen, nain kema damola nain-ke ikoka kiremi nainiw kemelowa-ke niar imenarinon. <sup>21</sup>Emeria eena uroma opam-ikaeya sirirowa aawiya naap. Ne uroma wueliwa yakiep muuka muuta nain kemelami sirirowa aawok nain me kema suuwion. <sup>22</sup>Ne nis pun naap, aakisa ni kema damolalep ikeman. Ikoka yo nainiw nia urufamkun ni manek akena kemelowen. Kemelowa nain niar iiarowa me pepeke. <sup>23</sup>Ne iir nain ni maa kuisow-ko me efa nokarowen.

Aria yo makena nia maakiyem, yo unuma-pa Auwa maa-ko nokarowen-na eliw nia apekarinon. <sup>24</sup>Iiriw yo unuma-pa maa-ko me nokareman. Ne ikoka fain nokarowen-na eliw aawep kemelow manekiw ikowen.”

### **Yeesus miiw sira iiriw nomakek**

<sup>25</sup>“Yo maa unowa fain maemi arekin opora nia iromam. Ne ikoka yo arekin opora nainiw me oninen, weetak. Epa nain kerereya Auwa maemi opora makena fookap nia maakinon. <sup>26</sup>Iir nain yo unuma-pa Auwa kakeniw nokarowen. Me yos-ke Auwa nia nokarominen. <sup>27</sup>Weetak. Auwa ona ni nia kookaliya. Moram niena yo efa kookaliman, ne pun yo o wiar ekapem nain makena efa naiman. <sup>28</sup>Makena, yo Auwa wiar ikok miiwa orom. Ne aakisa miiwa fain piipupap nainiw Auwa wiar urupinen naep.” Naap maek.

<sup>29</sup>Naeya ona teeria-ke maakemik, “Aa, aakisa opora makena fookap yia maaken, arekin opora me yia iroman. <sup>30</sup>Neemi aakisa i kema

aawimik, maa muutitik no amisaren. Mua-ko nefa nokarowa nain me maowa ikaiwkin nookikir wiar amisaren. Ne aakisa i nefa amisaremik, no Mua Maneka wiar ekapon.” <sup>31</sup>Ne wia maakek, “Ni aakisa makena efa naiman-i? <sup>32</sup>Aria epa nan ekapiya ne aakisa fan kererek, ni ikoka yo yaisow efa wuap baurarep owowa ononer arowen. Nain yo me yaisow ikainen, weetak, Auwa ona efamiya ikainon. <sup>33</sup>Yo oram me maiyem, ni yena efamiya baliwep kema sonom eliwiiw ikeka naep opora nain nia maakem. Makena, ni miiwa feek ikok yoowa aawem-ikowen. Nain ni kekaneka, yo miiw sira unowa nain iiriw nomakem.”

### Yeesus ona teeria wia asipekam naep Mua Maneka farek

**17** <sup>1</sup>Aria Yeesus opora nain wia maakep-puap iinan mokakemi Mua Maneka faremi maek, “Oo Auwa, yo epa aakisa efar ekapok. Ikoka nena Muuka-ke no unum maneka ariman nefa wuinok naep-na no aakisa Muuka fain unum maneka ne parin onaiya iwe. <sup>2</sup>Moram nos-ke miiw mua wia urufowa nain o wapena-pa wiar wuan, ikoka wi mua eena o iwon nain anane eliwa ikowa wiinok naep. <sup>3</sup>Anane eliwa ikowa nain onoma feenap, wi no nefa amisarep no naisow Mua Maneka makena-ke nefa nauk, ne Yeesus Krai pun amisaruk, eena nos-ke sesekan nain. <sup>4</sup>Yo mauwowa eena yien nain welawami no unum maneka ne kekanowa nain ariman arowam. <sup>5</sup>Aria Auwa, yo iiriw miiwa me imenarowa ikaeya no nefamiya ikemkun unum maneka ne parina efar ikua nain aakisa nain ariman efar wue.

<sup>6</sup>Ne wi mua eena miiw sira-pa ikaiwkin wia aawep yo teeria-pa efar wuan nain iiriw wia maakemi unuma ariman nefa wuamkun nefa amisaremik. Wi nena teeria-ke, ne yo yiomaken. No opora nefar opimik. <sup>7</sup>Ne aakisa amisaremik, maa sira-sira yo yiomaken nain iiwawun no nefarik. <sup>8</sup>Moram opora eena nena efa maaken nain iiriw wiemkun aawemik. Yo no nefar ekapem nain wi amisaremik, ne nos-ke efa sesekan nain pun makena-ke naimik.

<sup>9</sup>Yo wi wia naep nefa fariyem. Me miiw mua unowa nain wia naep nefa fariyem, weetak. Wi mua eena yo yieya opora efar opimik nain naep nefa maakiyem, moram wi nain nena teeria-ke. <sup>10</sup>Maa muutitik yo urufiyem nain no nefarik. Ne maa muutitik no urufin nain yo efarik. Ne wis-ke yo unum maneka nain ariman efa wuimik.

<sup>11</sup>Yo aakisa no nefar ikiwiyem. Yo miiwa feeke senam me ikainen, nain wis-ke feek ikaikuan. Oo Auwa, no eliwa ne onaiya akena-ke, nos-ke wia kekanoweya nena unuma-pa nefar ikauk, unuma eena yo yien nain. Naeya wi teeria kuisow epaskun ikauk, i yiam erup ikemik naap. <sup>12</sup>Yo wiamiya ikok wia urufam-ikemkun unuma eena yien nain makena efar naemi yookimik. Naeya mua kuisow-ko me mesenalek. Nain mua kuisow makena, ikoka mesenalidon. Neemi nena opora maek nain makena

arowinon. <sup>13</sup>Yo nan nefar ikiwiyem. Ne yo miiwa-pa feek ikok opora fain maemkun wi miimap kemeluk. Yo kemelowa nain-ke wi kema-pa wiar taanep ikainok.

<sup>14</sup>Yo no opora wia maakem nain wi miiw mua-ke wia iiwuarimik. Moram yo teeria yena saarik, wi miiw sira-pa me ikemik. <sup>15</sup>Nain miiwa-pa feeke wia iirare naep me nefa nokariyem, weetak. Eewua tepak-pa wia wuap-pueya mua samora-ke me wia aawinok. <sup>16</sup>Wi yena saarik, wi miiw sira-pa me ikemik. <sup>17</sup>No opora makena-ke. Opora nain kema-pa wiar wueya wi no sira-pa ikok sira onaiya akena aruk. <sup>18</sup>Nos-ke efa sesekeya miiwa orom, ne sira naapiw ikoka yena wia sesekamkun miiw unowa nain ikiwikuan. <sup>19</sup>Yo wi wia naep sira onaiya akena ookami no wapena-pa yame wuiyem. Naeya wis pun sira naap, opor makena-ke wia kekanoweya sira eliwa ne onaiya ikok no uuwomuk.

<sup>20</sup>Ne aakisa me wi fain muutiw wia naep nefa fariyem. Wi mua papako wi teeria fain opora wiar miimap yo opora efar opimik nain pun wia naep nefa fariyem. <sup>21</sup>Wi teeria kuisow epaskun ikauk naiyem, no efamiya ikon ne yo nefamiya ikem naap. Ne wis pun eliw i yiamiya epaskun ikauk, naeya nos-ke efa sesekan nain miiw mua-ke makena-ke nauk. <sup>22</sup>Unum maneka yo yien nain wis pun wiem. Naeya teeria kuisow epaskun ikauk, i yiam erup epaskun ikemik naap. <sup>23</sup>Yo nefamiya ikem, sira naapiw wis pun efamiya ikauk, naeya wi miiw mua efa amisarep, nos-ke yo efa sesekeya ekapem, naap efa nauk. Ne wi fain pun amisaruk, yo teeria nain nena wia kookalin, yo efa kookalin naap.

<sup>24</sup>Oo Auwa, wi teeria eena yo yien nain yena efamiya yo ikaiyem neek ikok parina ne unum maneka efar urufam-ikauk, eena nena yien nain. Iriw miiwa me imenarowa ikaeya nena yo efa kookalep yien nain. <sup>25</sup>Oo Auwa, no kakeniw-ke, miiw mua no me nefa amisaremik, nain yos-ke nefa amisarem, ne wi teeria fain-ke amisaremik, nos-ke efa sesekeya ekapem. <sup>26</sup>Yo unuma nefa ariman wuamkun no nefa amisaremik. Naap onam-ikemkun wi fain amisaruk, no efa kookalin naap wis pun wia kookalin. Neemi wi naap wiam kookalem-ikauk. Naeya yo wi wiamiya ikainen.” Naap maek.

**Yuudas-ke Yeesus wi iiwua wapena-pa wiar wuak**  
(*Matiu 26.47-56, Mak 14.43-50, Luk 22.47-53*)

**18** <sup>1</sup>Aria Yeesus Mua Maneka farep-puap ona teeria wiamiya oromi Kidron epa uruma puukap okaiwi ekamik. Epa nain nomokow unowa ikua. Ne wi ikiwep nan ikemik. <sup>2</sup>Yeesus anane ona teeria wiamiya ikiwep nan ikaimik. Naapeya Yuudas eena Yeesus wi iiwua wapena-pa wiar wuowa nain epa nain amisarek. <sup>3</sup>Ne os-ke wi Rom anim onom teeria papako ne wi tempel ami mua wia aawep unowiya ikiwemik. Wi teeria nain wi pris woos mua ne wi Farisi-ke wia sesekamik. Wiena



parina ne arua isimap irakow maa opap feekiya ikiwemik. <sup>4</sup> Aria wi ikoka kamenap onikuan nain Yeesus-ke wiar amisarep wi urupiwkin ekap wia nokarek, “Ni naarew akupiman?” <sup>5</sup> Ne maakemik, “I Nasaret owow mua Yeesus naimik nain akupimik.” Ne wia maakek, “Yo fan ikem.” (Ne Yuudas pun wi wiamiya nan iimarep ikua.) <sup>6</sup> Ne aria Yeesus-ke naap maeya wi mikikiriw erami miwa-pa wakiemik. <sup>7</sup> Ne nainiw wia nokarek, “Ni naarew akupiman?” Ne maemik, “Nasaret mua Yeesus.” <sup>8</sup> Ne wia maakek, “Yo iiriw nia maakem, yo fan ikem. Ni yos-ke efa naep-na yena teeria fain me wia opaka, wi ikiwuk.” <sup>9</sup> Ona teeria mua kuisow-ko me opamik. Naeya Yeesus ona iiriw maek nain makena arek, feenap, “Wi teeria nena yien nain kuisow-ko me mesenalek.”

<sup>10</sup> Ne Saimon Pita-ke naap urufap fura maala mufep aawep pris maneka uuwow mua ifana aken ekeria wiar puukak. Mua nain unuma Malkus. <sup>11</sup> Ne Yeesus-ke Pita maakek, “Fura nain neek wue. Yo Auwa suusa yieppuak nain iirarinen-i? Weetak akena.”

### **Yeesus aawep Aanas wiar pikiwemik**

<sup>12</sup> Ne aria wi anim onoma wienna woos mua onaiya ne wi tempel ami mua teeria, wi unowiya Yeesus opap kaikap pikiwemik. <sup>13</sup> Ne Aanas kiikir wiar pikiwemik. Aanas-na Kaiafas emeria wiawi-ke.<sup>f</sup> Iir nain wi pris woos mua Kaiafas-ke ikua. <sup>14</sup> Iiriw os-ke Yeesus maemi maek, “Mua kuisow-ke epa yiar aawep uminok.”

### **Pita-ke Yeesus me amisarem naek**

*(Matiu 26.69-70, Mak 14.66-68, Luk 22.55-57)*

<sup>15</sup> Aria Saimon Pita, Yeesus teeria mua oko ikos pun wi wiamiya aremi Yeesus ookamik. Pris woos mua, mua oko nain amisarek. Naapeya Yeesus ookami pika kemena ikiwok. <sup>16</sup> Ne Pita-ke pika omopora-pa nan iimarep ikua. Nan ikaeya mua oko nain-ke orop emeria eena omopora urufiya nain maakep Pita aawep kemena pikiwok. <sup>17</sup> Ne emeria nain-ke Pita maakek, “Nos pun me mua nain teeria-ki?” Naeya maakek, “Sa, yo weetak.” <sup>18</sup> Bug dabela oreya wi uuwow mua ne wi ami mua mia fulilep epia arem-ikemik. Pita pun wi wiamiya epia arem-ikua.

### **Pris woos mua-ke Yeesus nokarek**

*(Matiu 26.59-66, Mak 14.55-64, Luk 22.66-71)*

<sup>19</sup> Ne aria pris woos mua awona-ke Yeesus nokarek, ona teeria wi mua kame-kamenap ookamik, ne opora sira kamenap wia maakem-ikua

---

<sup>f</sup> **18.13** Aanas o pris woos mua-ke. Nain wi Rom anim onoma-ke o iirarep ona war Kaiafas pris woos mua wuamik. Aanas mua unumiya-ke, naeya wi Yuuda o pris woos mua-ke naemik. Naapeya Yeesus kiikir o wiar pikiwemik.

nain pun iiwawun nokarek. <sup>20</sup>Nokareya maakek, “Yo anane mua unowa mokok epa-pa opora ariman maiyem, ne lotu koorapa e tempel kemenapa wia maakem-ikem. Yo opora kuisow kokot-ko me maem-ikem. <sup>21</sup>Naeya yo moram efa nokarin? Wi eena yo opora efar miimam-ikemik nain wia nokare. Wi amisarep ikemik.” <sup>22</sup>Naap maeya ami mua oko-ke iikirap ifan epepiria aawemi maakek, “Pris woos mua opora naap-ko maakimik-i?” <sup>23</sup>Ne Yeesus-ke maakek, “Yo opor makena maem nain moram efa arufan? Ne opor samora maemkun-na baliwep efa maake.” <sup>24</sup>Yeesus eena kaikamik nain naap ikaeya Aanas-ke pris woos mua Kaiafas wiar sesekak.

**Pita-ke Yeesus me amisarem naek nain nainiw maek**  
(*Matiu 26.71-75, Mak 14.69-72, Luk 22.58-62*)

<sup>25</sup>Aria Saimon Pita iimarep epia arem-ikaeya papako-ke maakemik, “Makena, no o teeria-ke, ae-na?” Ne wia maakek, “Sa, yo weetak.” <sup>26</sup>Wi pris woos mua uuwow mua-ko nan ikua, Pita eena mua oko ifana wiar puukak nain kaka-ke. Os-ke Pita maakek, “Nos pun o wameiya nomokow pupura-pa nan ikon, yo me nefa urufam-i?” <sup>27</sup>Naeya Pita-ke maakek, “Weetak akena.” Naap maem-ikaeya aara farek.

**Yeesus Pailat wiar pikiwemik**  
(*Matiu 27.1-2 ne 27.11-14, Mak 15.1-5, Luk 23.1-5*)

<sup>28</sup>Ne uuriw akena Yeesus Kaiafas koorapa wiar ikaeya aawep wi Rom anim onom maneka koorapa wiar pikiwemik. Wi Yuuda-ke wi owow oko mia muura me wiar aawiyen naep pika kemenapa me ikiwemik. Moram wi mia eliwa ikok Pasowa maa enimiyan naemik. <sup>29</sup>Naapeya Pailat-ke orop wia nokarek, “Nee, ni mua fain maa mauwa oneya opora-pa wuaman?” <sup>30</sup>Naeya maakemik, “Makena, i mua nain sira samor akena me onekak-na feek me pekapekamik.” <sup>31</sup>Ne Pailat-ke wia maakek, “Aa-na pikiwep niena sira ookami opora-pa wueka.” Ne maakemik, “Nain, i mua pina wiar imenap wia ifakimowa nain kekanowa me yiemik.”<sup>g</sup> <sup>32</sup>Yeesus iiriw eena sira kamenap umowa wame maek nain makena arek.

<sup>33</sup>Ne Pailat nainiw koorapa ikiwep Yeesus farek. Ekapeya nokarek, “No wi Yuuda saria-ki?” <sup>34</sup>Naeya maek, “No nena kema-pa maen-i e mua papako-ke nefa maakiwkin maen?” <sup>35</sup>Naeya Pailat-ke maakek, “Yo Yuuda-ki? Naeya sira nain niar amisarinen. Nena Yuuda teeria-ke wi pris woos mua unowiya nefa opap fan nefa amapekapemik. Naeya nefa nokariyam, no maa mauwa oneya sira naap nefa onamik?” <sup>36</sup>Ne maakek,

---

<sup>g</sup> 18.31 Wi Yuuda Rom tepak-pa ikemik nain, maa papako wienna kot-pa kakenamik. Nain mua wia ifakimowa kekanowa wi Rom muutiw wiar ikua, wis-ke nomokow moke-pa wia ifakimem-ikemik.

“Yo saria maneka-ke, nain yo me miiwa fain sira saria ikem, yo yena onaiya. Yo miiwa fain saria ikekam-na yo efa opamik nain yena teeria-ke iikirami wi Yuuda wiamiya irakekamik. Weetak, yo me miiwa fain saria-ke.” <sup>37</sup>Ne Pailat-ke kiiriw maakek, “Naap nain no saria-ke name main-yon.” Naeya maek, “No pepeke main, yo saria-ke. Yo opor makena miiw mua nia maakowa naep imenarem. Ne wi mua opor makena kookalimik nain efa miimikuan,” naap maek. <sup>38</sup>Ne Pailat-ke nokarek, “Opor makena nain kamenap?”

**Pailat-ke Yeesus ifakimowa naek**

*(Matiu 27.15-31, Mak 15.6-20, Luk 23.13-25)*

Pailat nainiw orop wi Yuuda wia maakek, “Nee, yo mua fain pina-ko me wiar imenam noma. <sup>39</sup>Nain yo niena sira ookami wi mua koor ekap ikemik nain Pasowa fofa-pa mua kuisow piipuiyem. Naapeya ni Yuuda owow saria fain nia piipuominen-i?” <sup>40</sup>Naeya faremi maemik, “O weetak, i Barabas kookalimik, yia piipuoma!” Naap maemik. Barabas-na wi Rom anim onoma opora wiar fienap irakowa maneka imenak. Naapeya opap koor-pa wuamik.

**19** <sup>1</sup>Ne aria Pailat-ke Yeesus wi ami mua wapena-pa wiar wuak. Ne wis-ke saru-pu-puukamik. <sup>2</sup>Ne ifar suusa nain aawep wasiep ikiwosa-pa orowawamik. Naap onap mia suuwowa oka mia-pa korinowamik. <sup>3</sup>Ne ekap maakem-ikemik, “Oo maneka, wi Yuuda owow saria maneka!” Neemi ifan epepiria aawem-ikemik.

<sup>4</sup>Ne Pailat-ke nainiw orop wi Yuuda wia maakek, “Ni miimeka, yo mua fain poromkun urufeka, yo pina-ko me wiar imenam.” <sup>5</sup>Ne Yeesus ifar suusa woosa-pa orowawamik nain ne konim oka maala feekiya owaruma orok. Oraeya Pailat-ke wi Yuuda wia maakek, “Aakisa mua makena urufeka!” <sup>6</sup>Wi pris woos mua ne wi tempel ami mua wi unowiya Yeesus urufap faremi maemik, “Patot wareka! Nomokow moke-pa uminok!” Ne Pailat-ke wia maakek, “Ni niena aawep patot wareka. Yo o opora-pa wuowa nain pina-ko me wiar imenam.” <sup>7</sup>Naeya wi Yuuda-ke maakemik, “I sira naap ikua, mua naap nain uminok, moram Mua Maneka Muuka-ke wame naek.” <sup>8-9</sup>Ne Pailat nain miimap manek akena keker opap nainiw koor kemena ikiwep Yeesus nokarek, “No kaaneke imenaren?” Naap maakek nain opora-ko me kiripak. <sup>10</sup>Ne Pailat-ke maakek, “Yo opora-ko me kiripominan-i? Yo-ko efa amisaren-i? Yos-ke maemkun eliw nefa piipuikuan e nomokow moke-pa patot nefa warikuan.” <sup>11</sup>Ne maakek, “Mua Maneka ae me nefa nainon-na yo sira kamenap efa onowa nain no kekanowa marew akena. Naapeya mua eena no wapena-pa efa wuak nain pina manek akena onak.”

<sup>12</sup>Naapeya Pailat opora naap miimap Yeesus piipuekam naep era akupak-na wia, wi Yuuda-ke sisewaremi faremik, “No piipuinen nainan-

na i maiyen, no me Siisar womar-ke! Mua yo saria maneka-ke wame naiya nain Siisar iiwua-ke!” <sup>13</sup>Ne Pailat nain miimap wia fareya Yeesus epa maneka amaporomik. Epa nain unuma “Nomon Esimsa” naimik. (Ne wi Iibru feenap unufimik, “Gabata.”) Ne Pailat pun orop ona anim onom maneka pokow maa-pa pokak. <sup>14</sup>Pasowa onowa uurik ona naap kererion. Ne aakisa feenap nain unun ama aawem-ikaeya Pailat-ke wi Yuuda wia maakek, “Niena saria fanek!” <sup>15</sup>Nain miimap faremi maemik, “Amapikiwe, pikiwep nomokow moke-pa patot ware!” Ne wia nokarek, “Niena saria nomokowa-pa patot warinen-i?” Naeya wi pris woos mua-ke maakemik, “I saria oko-ko me ikua, Siisar waisow yiena saria-ke!” <sup>16</sup>Ne Pailat-ke Yeesus wiena wapena-pa wiar wuak, wi ami mua-ke nomokow moke-pa patot waruk naep. Naeya wi Yeesus aawep pikiwemik.

**Yeesus nomokow moke-pa patot waremik**  
(*Matiu 27.32-44, Mak 15.21-32, Luk 23.26-43*)

<sup>17</sup>Yeesus ona nomokow moke akuawowa suuwap epa oko “I mua woos oona” naimik nan pikiwemik. (Iibru opora-pa “Golgota” naimik.) <sup>18</sup>Ne epa nan nomokow moke-pa patot waremik. Mua wiam erup pun patot wiaep Yeesus oko-okaiwi-pa wia wuamik. <sup>19</sup>Opora fain iiriw Pailat-ke wia maakeya siisimep-puap Yeesus woos erekina-pa sererimemik, feenap siisimemik, “NASARET OWOW MUA YEESUS, WI YUUDA SARIA MANEKA.” <sup>20</sup>Wi Iibru, Rom ne Grik opora-pa siisimemik. Aria Yeesus sererimemik epa nain owow maneka mamaiya-pa ikua. Naapeya mua unowa soomaremi siisimowa nain urufam-ikemik. <sup>21</sup>Ne wi pris woos mua-ke ikiwep Pailat maakemik, “No moram ‘wi Yuuda saria maneka-ke’ naap siisimon? Weetak, no feenap siisime, ‘Mua fain ona maek, ‘Yo wi Yuuda saria maneka-ke,’ ’ naap siisime.” <sup>22</sup>Ne wia maakek, “Opora nan siisimem, naap akena ikainok.”

<sup>23</sup>Wi ami mua-ke Yeesus patot warep-puap mia suuwowa wiar sererikap mua erepam naap maa kuisow kuisow aawemik. Ona mia suuwowa maala nain pun wiar aawemik, nain warow epasuma marew, iriniya onamik. <sup>24</sup>Naeya maemik, “I fain me perekiyen,” naap maep maemik, “satu niirep mua naareke nomakep-na os-ke aawinok.” Naeya Mua Maneka opora maek nain iiwawun pepep erowawamik, feenap, “Yena mia suuwowa efar sererikap aawemik ne mia suuwowa maala nain satu niirep mua oko-ke efar aawok.” (Someka 22.18)  
Wi ami mua-ke sira nain onamik.

<sup>25</sup>Ne Yeesus ona onak, ne onak oko, ne Klopas emeria pun Maria, ne Maria oko, ona owowa Makdala, wi naap o mamaiya-pa iimarep ikemik. <sup>26</sup>Ona teeria mua oko, o mua nain senam akena kookaliya, os pun mamaiya-pa nan iimarep ikua. Ne Yeesus-ke urufami onak maakek, “Aite, mua fain muuka nae.” <sup>27</sup>Onak maakep-puap mua nain maakek, “Emeria

fain aite nae.” Naeya mua nain-ke Maria aawep ona koora pikiwep kakaltam-ikua.

### **Yeesus umok**

*(Matiu 27.45-56, Mak 15.33-41, Luk 23.44-49)*

<sup>28</sup>Aria maa muutitik nain weesereya Yeesus amisarek, aakisa uuwowa iiwawun welawam naek. Neemi Mua Maneka opora nain pepep erowami maek, “Yo kema enekariyem.” <sup>29</sup>Eka masia amina-ko nan ikua. Naeya maa oko wauroma aawep eka masia-pa suuwap kuumapa kokor erowap opaimika-pa wuomamik. <sup>30</sup>Aria Yeesus nain enep weesereya maek, “Aakisa uuwow kapa welawam!” Naap maep imakuna sekumaremi umok.

### **Ami mua-ke Yeesus kametkura-pa mikak**

<sup>31</sup>Pasowa enowa onowa nain maa muutitik saliwap uurik ona-pa onikuan. Ne Sabat nain pun manek akena-ke. Naapeya Sabat-pa sawi napuma nomokowa-pa naap me sererep ikauk naep wi Yuuda-ke Pailat nokaremi, mua-ko wia sesekeya ikiwep meren oona wiar ititiwkin ewur umiwkin wia iiraruk. <sup>32</sup>Naeya ami mua-ke ikiwep mua erup nain oko merena wiar ititap-puap ekap oko. <sup>33</sup>Ne Yeesus merena wiar ititu naep urufamik-na o iiriw umok. Umeya naap me onamik. <sup>34</sup>Ne mua oko-ke ona wiowa opap ikua nainiw Yeesus kametkura-pa mikeya aka eka asia onaiya fuok. <sup>35</sup>(Aria mua ona urufak nain-ke opora fain siisimok. Ne o fain maek nain makena. Ne ona wame maek, “Yo maem nain makena-ke.” Naeya nis pun makena-ke naeka.) <sup>36</sup>Aria Mua Maneka opora makena arinok naep maa unowa nain imenaromakek. Opora feenap,

“Oona ara kuisow me wiar ititikuan.” *(Eksodas 12.46, Someka 34.20)*

<sup>37</sup>Ne opor oko pun feenap maek,

“Wi mua eena mikamik nain urufikuan.” *(Sekaraiya 12.10)*

### **Yeesus sawi napuma pikip nomon ona-pa wuamik**

*(Matiu 27.57-61, Mak 15.42-47, Luk 23.50-56)*

<sup>38</sup>Aria mua oko unuma Yosep, o Yeesus opora wiar opam-ikua, nain wi Yuuda wia keker opap ariman me wame wuam-ikua. Ne aria Yeesus sawi napuma aawekam naep ikiwep Pailat nokarek. Ne Pailat eliw naakeya ikiwep sawi napuma nomokowa-pa iirarek. <sup>39</sup>Wiam erup Nikodemus ikos ikiwep naep onamik. Nikodemus-na iir oko uura ikiwep Yeesus urufak, mua nain. Os-ke maa tana ikin eliwa aawep feekiya ikiwok. Maa tana nain pina 30 kilo naap saarik. <sup>40</sup>Wiam erup sawi napuma aawep wi Yuuda wia soopimik sira nain ookami maa tana ikin eliwa nain konim kia-pa feefap nainiw sawi napuma wasiep amapikiwemik.

<sup>41</sup>Yeesus nomokow moke-pa umok epa nain nomokow pupura nan ikua. Ne mua wia soopowa nomon ona pun nan ikua. Nain irina ikua, mua-

ko nan me wuowa ikemik. <sup>42</sup>Wi Sabat maa enowa onowa maa muutitik saliwowa-ke naep ewuraremi nan-pariw pekap nomon ona-pa wuamik.

**Yeesus umep ikok iikirak**

*(Matiu 28.1-8, Mak 16.1-8, Luk 24.1-12)*

**20** <sup>1</sup>Aria Sande epa wiiwim Maria, Makdala owow emeria nain iikirap matmat ikiwok. Ikip fuunep nomon ona iiriw upep-puamik nain urufak-na nomona nain iirariwkin aakia ikua. <sup>2</sup>Naap urufap nan-pariw kiremi karuwiiw ikip Saimon Pita ne mua oko nain ikos wia maakek, mua eena Yeesus kookalem-ikua nain. Feenap wia maakek, “Yiena Maneka sapuka iiriw aawep amapikiwemik ya. Ne epa kaanek wuamik nain me amisaremik.” <sup>3</sup>Aria wiam erup naap miimap wis pun karuemik. <sup>4</sup>Ne mua oko nain-ke Pita piipuap o kiikir ikip fuunek. <sup>5</sup>Fuunep tepak me ikiwok, oram ineka kuep nomon ona nain urufak-na konima muutiw nan ikua. <sup>6</sup>Ne Pita-ke murarep fuunemi iiwawun kemena ikiwok. Kemena ikiwok-na makena, konima muutiw nan ikaeya urufak. <sup>7</sup>Ne konim oko ikiwosa wasiomamik nain pun nan oram ikua. Baliwep wasiep-puiwkin ikua. <sup>8</sup>Ne mua eena miimep fuunek nain pun kemena ookap ikip naap urufap maek, makena. <sup>9</sup>(Wiam erup naap urufamik, nain Mua Maneka opora Yeesus umep iikirowa maek nain kema me aawemik.) <sup>10</sup>Naap ikok wiam erup nainiw kirep ikiwemik.

**Yeesus Makdala owow emeria Maria nain wiar imenarek**

*(Matiu 28.9-10, Mak 16.9-11)*

<sup>11-12</sup>Aria Makdala owow emeria Maria-ke nomon ona nain mamaiya-pa iimarep ikok omem-ikua. Omemi ineka kuep kemena mokakek-na ensel erup wia urufak. Ensel erup nain konim kia wuap Yeesus wuamik epasuma nan-pariw pokap ikemik, oko ikiwos ona-pa ne oko meren ona-pa naap pokap ikemik. <sup>13</sup>Naeya wis-ke Maria nokaremik, “Nee, no moram omomin?” Ne wia maakek, “Yena Maneka efar aawep amapikiwemik. Pikiwep kaanek wuamik-yon aa!” <sup>14</sup>Naap maep kirek-na Yeesus iimarep ikaeya urufak. <sup>15</sup>Miiriram-ikaeya Yeesus-ke nokarek, “No moram omomin? Ne pun naarew akupin?” Maria kema maek, epa fain urufow mua-ke efa nokariya naep maakek, “Sira eliwa, nos-ke o aawep-na baliwep mae. Naeya ikiwep aawinen.” <sup>16</sup>Ne Yeesus-ke unuma teekami “Maria!” naeya miimap kiremi iibru opora-pa maakek, “Raboni.” (Kemena feenap, “Somek mua.”) <sup>17</sup>Ne maakek, “Yo me efa opa, yo Auwa wiar urupowa eewuar. No ikiwep yo yookam-miemik nain wia maakome, ‘Yo yena Auwa wiar ikiwiwem, o nis pun niena Niawi-ke, yena Mua Maneka, ne niena Mua Maneka nain!’ ” <sup>18</sup>Naeya kirep ikiwep Yeesus teeria wia maakek. Maneka urufak nain wia maakemi eena o opora maakek nain pun iiwawun maek.

**Yeesus ona teeria wiar imenarek**  
(*Matiu 28.16-20, Mak 16.14-18, Luk 24.36-49*)

<sup>19</sup>Sande nain urer akena Yeesus teeria wi Yuuda wia keker opap koor omopora koonowap kemena-pa ikemik. Nan ikaiwkin Yeesus ona wi gone-pa wiar imenarep wia maakek, “Ni kema sonom eliwa ikeka.” <sup>20</sup>Naap wia maakemi ona wapena ere-erup ne kametkura wia ofakowak. Naeya wi wiena Maneka urufap manek akena kemelamik. <sup>21</sup>Ne naapiw wia maakek, “Ni kema sonom eliwa ikeka. Yo Auwa-ke efa sesekeya ekapem, naapeya yos pun naap nia sesekinen.” <sup>22</sup>Naap maemi opaimik awowa wia fuurami wia maakek, “Ewar Eliwa ni mia-pa niar ikainok. <sup>23</sup>Naeya ni wi mua pina wiar wasirkomowen-na pina nain wiar weeserinon. Ne ni pina me wiar wasirkomowen-na naap wiar ikainon.”

**Yeesus Tomas wiar imenarek**

<sup>24</sup>Aria Yeesus ona teeria wiar imenarek nain mua kuisow nan me ikua. Mua nain unuma Tomas, unum oko Didimus naimik. <sup>25</sup>Aakisa fan ekapeya wi papako-ke maakemik, “I yiena Maneka yiar imenareya urufamik!” Ne wia maakek, “Yo ewur makena-ke me nia nainen. O imenareya yena mokok onaiya urufap wapen tetelka o wapena patot waremik nain epasuma-pa wiar suuwap urufinen, ne kametkura-pa mikamik nain pun opap urufinen. Naap onap-na makena nainen!” Naap maek.

<sup>26</sup>Aria murarow Sande-pa Yeesus teeria nainiw kooora-pa nan ikemik, ne Tomas pun wiamiya ikua. Omopora wiam upep ikaiwkin Yeesus nainiw gone-pa wiar imenarep wia maakek, “Ni kema sonom eliwiw ikeka.” <sup>27</sup>Ne Tomas maakek, “Nena wapen tetelka feeke suuwap urufe, aa yo wapena-ke. Ne wapena kametkura-pa efa opap furewe. No makena efa naowa nain kema unu-unowa wuowa neek ikainok, makena nae.” <sup>28</sup>Naeya Tomas-ke maakek, “Makena, no yena Maneka-ke, no yena Mua Maneka-ke!” <sup>29</sup>Naap maeya maakek, “No aakisa yo efa urufap makena nain, nain eliwa. Ne wi mua yo me efa urufowa makena naimik nain kema eliw akena ikaikuan.”

**Opora fain onom akena**

<sup>30</sup>Aria iiriw Yeesus ona teeria mokok epa-pa maa miililina unowa onomakek nain papako fan me siisimem. <sup>31</sup>Ne yo siisimem fain urufap maeka, Yeesus-na Krais-ke, Mua Maneka Muuka-ke, naap maowen. Opor makena wiar naemi ni kekanep naap ookam-ikowen-na o unuma-pa anane eliwa ikowa imenowen. Yo naap maeka naep opora unowa nain siisimem.

**Yeesus ona teeria mua papako wiar imenarek**

**21** <sup>1</sup>Aria iir oko-pa Yeesus teeria Taiberias eka saawirinowa-pa ikaiwkin nainiw wiar imenarek. Wiar imenarek nain sira feenap.

<sup>2</sup>Saimon Pita, Tomas, eena unuma oko Didimus, Nataniel, Kaana owow mua-ke, wi Galili kame, Sebedi muuka wiam erup ne nainiw mua erup, wi naap nan ikemik. <sup>3</sup>Ne aria Saimon Pita-ke wia maakek, “Yo mera sia wafurowa ikiwiyem.” Ne wis-ke maemik, “Is pun nookiyen.” Aria wi unowiya orop aasa suuwap sia wafuramik. Iir nain uura mera kuisow akena-ko me aawemik.

<sup>4</sup>Naap ikaiwkin uuriw epa wiimeya Yeesus imenarep eka pona-pa iimarep ikua. Wi urufap mua oko-ke naemik. <sup>5</sup>Ne wia farek, “Nee, emar unowik, ni mera-ko aaweman-i?” Ne maemik, “Weetak akena oo.” <sup>6</sup>Aria wia maakek, “Sia aawep aken ekeria-pa wafureka, naap onap mera aawowen.” Naap wia maakeya sia aawep aken ekeria-pa wafuramik-na mera unowa akena wiar iwak. Mera kerew akena, naeya sia purupep aasa-pa wuowa me pepep.

<sup>7</sup>Naeya Yeesus ona teeria mua oko senam akena kookaliya, mua nain-ke Pita maakek, “Mua nain yiena Maneka-ke.” Naap maeya miimap ona mia suuwowa iirarep-puak nain aawep aep eka pikinek. <sup>8</sup>Ne mua papako aasa-pa nan ikok mera sia aas onaiya pepamik. Wi me epasia-pa ikemik, andet mita naap.

<sup>9</sup>Wi urupemik-na mukuna urufamik. Mera mukuna-pa ikua, ne emer ikowa pun mukun mamaiya-pa nan ikua. <sup>10</sup>Ne Yeesus-ke wia maakek, “Mera aaweman nain papako pepeka.” <sup>11</sup>Naeya Saimon Pita-ke orop aasa ekap mera mane-maneka nain sia onaiya mufep iiwawun pona purupok. Mera senam akena, 153 naap iwomakek nain sia me puok. <sup>12</sup>Aria Yeesus-ke wia maakek, “Aria feek ekapep maa-ko enimeka.” Ne wi kema unu-unowa wuap mua kuisow kekanep-ko me nokaremik. Moram wi amisaremik, o wiena Maneka-ke. <sup>13</sup>Aria Yeesus ekap emer ikowa aawep wienakep-puap mera wienakek.

<sup>14</sup>Aria o umep iikirap ikok ona teeria wiar imenarem-ikua nain aakisa imenarek fain-ke arow arek.

#### **Yeesus Pita maakek, “Yena teeria wia kakalte.”**

<sup>15</sup>Aria wi maa enep weesereya Yeesus-ke Saimon Pita nokarek, “Oo Saimon, Yon muuka, wi teeria fain yo efa kookalimik, nain nos-ke manek akena efa kookalin-i?” Ne Saimon-ke, “Ae, Maneka, no efa amisaren, yo nefa kookaliyem.” Naeya maakek, “Yena sipsip muuk teeria baliwep wia kakalte.” <sup>16</sup>Naap ikok nainiw nokarek, “Oo Saimon, Yon muuka, yo efa kookalin-i?” Ne Saimon-ke maakek, “Ae, Maneka, yo nefa kookaliyem nain no amisaren aa.” Naeya maakek, “Yena sipsip teeria baliwep wia urufam-ike.” <sup>17</sup>Naap ikok kiiriw nainiw nokarek, “Oo Saimon, Yon muuka, yo efa kookalin-i?” Ne naap nokarowa arow areya kema pinarek. Ne maakek, “Maneka, no maa unowa amisaren. Yo nefa kookaliyem nain pun amisaren!” Naeya maakek, “Yena sipsip teeria baliwep wia



saalolokam-ikome.”<sup>18</sup> Naap maemi kiiriw maek, “Yo makena nefa maakiyem, no takira ikok konima nena ainep inakirowa kaikap epa kaanek soomarowa nain nena kookalowa-pa soomarem-miawon. No ikoka panep wapena tiinowap ikaeya mua oko-ke inakirowa kaikomep epa me kookalin neeke nefa pikiwinon.”<sup>19</sup> (Opora fain Pita opor kokosa maakek, ikoka o kamenap umemi Mua Maneka unuma pirinon nain.) Naap ikok kiiriw maakek, “Aria no naap yookam-ike!”

<sup>20</sup> Ne wi ikiwem-ikok Pita kirek-na mua oko murarep wiokam-ikaeya urufak, eena Yeesus o senam akena kookaliya nain. Iiriw wi Pasowa maa enem i os-ke maar muutiw kirep nokarek, “Maneka, mua naareke wi iiwua wapena-pa nefa wuinon,” mua nain. <sup>21</sup> Ne aria iram-ikok Pita-ke Yeesus nokarek, “Maneka, mua nain ikoka kamenap arinon?” <sup>22</sup> Naeya maakek, “O naap ikaeya yo nainiw miiwa ekapinen nainen pun eliw, me no maa-ke. No naap yookam-ike.” <sup>23</sup> Ne opora nain-ke manekareya mua nain me uminon naem-ikemik. Nain Yeesus naap-ko me maek, mua nain me uminon, o maek, “Mua nain naap ikaeya yo nainiw ekapinen nainen pun eliw, me nena maa-ke,” naap maek.

<sup>24</sup> Aria mua nain-ke opor unowa fain makena-ke naep ona siisimomakek. Ne i amisaremik, opor makena maek. <sup>25</sup> Yeesus maa unow akena onomakek. Maa unowa nain iiwawun siisimekamik-na maifa unowa nain-ke miiwa epa siineya kamenap onekamik.